

廣平府志

ル 5

1572

13



門八名65  
1572  
3



重修廣平府志卷三十四

藝文略 經史子集方志

經部

周易觀畫二卷

宋永年李椿撰  
宋史藝文志

魏了翁序曰廣平李公嘗大書六十四卦之象於屋壁玩之三月而有得焉於是為書題曰觀畫

易叢說十卷

金磁州趙秉文撰  
金史本傳

元好問謂其自幼至老未嘗一日廢書不觀著易中庸論語孟子解為文出於義理之學故長於辨析

讀易備忘

元洛水劉肅撰  
元史本傳

學易記

元廣平何榮祖撰  
元史本傳

周易增注十卷

明磁州張鏡心撰  
奇孫張壬林重刻  
明史藝文志作

重刊... 藝文略 經部

十二卷

四庫全書提要云是編用注疏之本隨文闡發多釋義理無弔詭之詞亦無深微之論說易家之墨守宋儒也者

周易衍辭 明雞澤劉誠撰

黃虞稷曰其書專辨納甲飛伏之非

易經解惑讀易隨筆 明永年王立極撰

易解 明永年蔡國熙撰

易畫管窺 明成安陳廷謨撰

芸窗易草四卷 國朝永年閻斌撰

邑人武澄清序云鄉前輩閻允中先生天性純篤博涉經史尤邃於易年八十每日猶朗誦一遍澄少時

猶及見其人立必正方行必正履絕無世俗猥鄙之態當日趨時尚者竊笑其迂今觀其所著芸窗易草四卷於古今治亂興衰之故人事吉凶消長之機洞悉其源委且每釋一爻必於六十四卦三百八十四爻中擇其詞之相類者參觀互證以詳辨其異同其引經據典觸類旁通實能發前人所未發以視世之尋章摘句拘文牽詞者奚啻霄壤非通儒其孰能之迂耶否耶先生人品端方學術純正洵足為後學楷模歲己巳酌堂弟邀集同人呈請與張覆輿先生同入祀鄉賢蒙督學賀雲甫侍郎會同直隸制臺曾滌生相國聯銜入奏業經部議覆准從此馨香百代俎豆千秋先生之潛德幽光與斯書共傳不朽矣是編為先生手抄之書閱時既久字多殘缺其太極陰陽先天後天方圓等圖亦皆紊亂失次澄與二三同志悉心考訂校證無訛釀金付梓以公海內是為序

周易管見 永年金振聲撰

易象淺釋 永年王思禮撰

右易類

無逸直解一卷

金磁州趙秉文撰 有傳刻本

自序曰伏觀自古忠之大者未有若周公者也以成王年幼恐其荒怠作無逸一篇以伸勸戒舉昔殷三賢王及周文王皆以憂勤得壽考無窮以致成王享國長久刑措四十年不用至今稱為賢王之首此皆周公篤實愛君之力也其後唐明皇時宋相獻無逸圖帝列為屏風置之左右穆帝時崔植又請以無逸為元龜然則無逸一篇乃萬世之龜鏡也蒙國厚恩無以圖報謹依注疏撰無逸直解因以上獻仰祝無疆

尚書政要

元清河元明善譯 元史本傳

史言詔明善節尚書經文譯 其有關政要者書成以進

尚書纂要

明成安史焯撰 經義考

洪範補註

明雜澤劉誠撰 舊志

尚書傳注

國朝邯鄲宋之傑撰 舊志

右書類

毛詩二十九卷

漢趙人毛萇撰 漢書藝文志

詩經會意

明雜澤趙真撰 經義考

詩經朱注考

明永年劉慶孫撰 經義考

詩經鐸

明永年申佳允撰 有傳刻本 經義考

詩鏡

同上 同上

右詩類

周禮注疏四十二卷

唐永年賈公彥撰 有官刻本 舊唐書經籍志作五

藝文略 經部

卷十

四庫全書提要云周禮一書上自河間獻王於諸經之中其出最晚其真偽亦紛如聚訟不可縷舉惟橫渠語錄曰周禮是當之書然其間必有未世增入者鄭樵通志引孫處之言曰周公居攝六年之後書成歸豐而實未嘗行蓋周公之為周禮亦猶唐之顯慶開元禮預為之以待他日之用其實未嘗行也惟其未經行故僅述大略俟其臨事而損益之故建都之制不與召誥洛誥合封國之制不與武成孟子合云云其說差為近之然亦未盡也夫周禮作於周初而周事之可考者不過春秋以後其東遷以前三百餘年官制之沿革政典之損益除舊布新不知凡幾其初去成康未遠不過因其舊章稍為改易而改易之人不皆周公也於是以後世之法竄入之其書遂雜其後去之愈遠時移勢變不可行者漸多其書遂廢此亦如後世律令條格率數十年而一修則必有所附益特世近者可考年遠者無徵其增刪之迹遂靡所稽統以為周公之舊耳迨乎法制既更簡編猶在好古者留為文獻故其書閱久而仍存此又如開

元六典政和五禮在當代已不行用而今日尚有傳本不足異也使其作偽何不全偽六官而必闕其一者以實其贗古文尚書是也劉歆宗左傳而左傳所云禮經皆不見於周禮儀禮十七篇皆在七略所載古經七十篇中禮記四十九篇亦在劉向所錄二百十四篇中而儀禮聘禮賓行饗餼之物禾米芻薪之數邊豆簋簠之實銅壺鼎甕之列與掌客之文不同又大射禮天子諸侯壺鼎甕之列與掌客之文不同記雜記載子男執圭與典瑞之文不同禮器天子諸侯席數與司几筵之文不同如斯之類與二禮多相矛盾歆果贗託周公為此書又何難牽就其文使與經傳相合以相證驗而必留此異同以啟後人之攻擊然則周禮一書不盡原文而非出依託可概睹矣考工記稱鄭之刀又稱秦無廬鄭封於宣王時秦封於孝王時其非周公之舊典已無疑義南齊書稱文惠太子鎮雍州有盜發楚王家獲竹簡書青絲編文廣數分長二尺有奇得十餘簡以示王僧虔僧虔曰是科斗書考工記則其為秦以前書亦灼然可知雖不足以為當冬官然百官為九經之一共工為九官之

藝文略

一先王原以制器為大事存之尚稍見古制俞庭椿  
 以下紛紛割裂五官均無知妄作耳鄭注隋志作十  
 二卷賈疏文繁乃析為五十卷新舊唐志並同今本  
 四十二卷不知何人所併元於三禮之學本為專門  
 故所釋特精惟好引緯書是其一短歐陽修集有請  
 校正五經特精子欲刪削其書然緯書不盡可據亦非  
 盡不可據在審別其是非而已不必竄易古書也又  
 好改經字亦其一失然所注但曰當作某耳尚不似  
 北宋以後連篇累牘動稱錯簡則亦不必苛責於元  
 矣公彥之疏亦極博核足以發揮鄭學朱子語錄稱  
 五經疏中周禮疏最好蓋宋儒惟  
 朱子深於禮故能知鄭賈之善云

儀禮注疏十七卷

唐永年賈公彥撰

舊唐書經籍志作五十

卷

四庫全書提要云儀禮出殘闕之餘漢代所傳凡有三  
 本一曰戴德本以冠禮第一婚禮第二相見第三士  
 喪第四既夕第五士虞第六射第七燕禮第八大射  
 司徹第九鄉飲酒第十鄉射第十一燕禮第十二大  
 射第十三聘禮第十四公食第十五觀禮第十六喪

服第十七一曰戴聖本亦以冠禮第一婚禮第二相  
 見第三其下則鄉飲酒第四鄉射第五燕禮第六大射  
 第七士虞第八喪服第九特牲第十少牢第十一有  
 司徹第十二士喪第十三既夕第十四聘禮第十五  
 公食第十六觀禮第十七一曰劉向別錄本即鄭氏  
 所注賈公彥疏謂別錄尊卑吉凶次第倫序故鄭用  
 之二戴尊卑吉凶雜亂故鄭不從之也其經文亦有  
 二本高堂生所傳者謂之今文魯恭王壞孔子宅得  
 古儀禮五十六篇其字皆以篆書之謂之古文元注  
 參用二本其從今文而不從古文者則古文大書古  
 文附注士冠禮闕西闕外句注古文闕為棊闕為感  
 是也從古文而禮闕西闕外句注古文闕為棊闕為感  
 士冠禮醴辭孝友時格句注今文格為嘏是也其書  
 自元以前絕無注本元後有王肅注十七卷見於隋  
 志然賈公彥序稱周禮注者則有多門儀禮所注後  
 鄭而已則唐初肅書已佚也為之義疏者有沈重見  
 於北史又有無名氏二家見於隋志然皆不傳故賈  
 公彥僅據齊黃慶隋李孟哲二家之疏定為今本其  
 書自明以來刻本舛譌殊甚顧炎武日知錄曰萬曆  
 北監本十三經中儀禮脫誤尤多士婚禮脫壻授綏

姆辭曰未教不足與為禮也一節十四字賴有長安石經據以補此一節而其注疏遂亡鄉射禮脫士鹿中翻旌以獲七字士虞禮脫哭止告事畢賓出七字特牲饋食禮脫舉解者祭卒解拜長者答拜十一字少牢饋食禮脫以授尸坐取簞與七字此則秦火之所未亡而亡於監刻矣云云蓋由儀禮文古義與傳習者少注釋者亦代不數人寫刻有譌粹不能校故紙漏至於如是也今參考諸本一一釐正著於錄焉

禮記正義八十卷 唐永年賈公彥撰

案孔穎達正義序有與賈公彥等奉詔撰之文則此書與今行正義當為一書

禮經纂要

明成安侯君擢撰經義考

祭義纂要

國朝肥鄉李鯨撰肥鄉志

右禮類

虞氏微傳二篇

周趙相虞卿撰漢書藝文志

春秋穀梁傳集解

晉清河范甯撰晉書本傳

春秋摘句十卷

後魏肥鄉馮元興撰魏史本傳

春秋歸正書

明肥鄉張承祚撰經義考

春秋集解

明肥鄉張夢周撰肥鄉志

春秋宗傳

明雞澤郭恕撰經義考

案康熙志舊志皆與經義考同惟縣志人物傳內作郭潤撰與此歧異俟攷

右春秋類

古文孝經注一卷

魏邯鄲劉卻撰舊唐書經籍志

孝經疏五卷 唐永年賈公彥撰 唐書藝文志舊書同

右孝經類

七經正義 宋肥鄉李維撰 宋史李沆附傳

五經要語 元肥鄉竇默等撰 元史商挺傳

史言此書凡二十八類

勉菴說經十卷 國朝雞澤齊祖望撰 舊志有傳刻本

四庫全書提要云是書凡讀易辨疑三卷尚書一得錄一卷詩序參朱一卷說禮正誤三卷春秋四傳偶筆一卷續筆一卷大概易則辨程朱之誤書則正蔡氏之譌詩多遵小序而攻朱注禮則正陳氏之失春秋則糾駁胡傳而左氏公穀亦互有是非然率以臆斷不能根據古義元元本本以正宋儒之失也 自序云天地所以常存而不敝道持之也先聖後聖所以遞傳而不息道衍之也道無可見賴文以宣之

是故天以其道詔聖人則宣之於河圖洛書之文聖人以其道詔天下來世則宣之於六經之文也者道之寄也伏羲啟之列聖紹之仲尼集其成焉於是天地古今之文皆在仲尼矣彼夫易三聖之文也仲尼贊之則為仲尼之易尚書四代之文詩西周及十五國之文也仲尼刪之則為仲尼之書與詩禮樂周公制作之文也仲尼正之則為仲尼之禮樂春秋魯史之文也仲尼修之則為仲尼之春秋故曰文王既沒文不在茲乎文在仲尼則道在仲尼矣吾嘗謂六經之文得仲尼而始備得子與氏而始尊得漢儒而始弗墜得宋儒而始明蓋漢當秦火之後搜採之力多宋承歷代校讐之餘講求之學密也然余猶有不能愜者伊川之易傳恥言占筮本義之卦變竟廢乾坤詩序固饒謬說而朱子排斥過當或不無古是而今非春秋所書縱多失禮而文定以得禮為常事不書則幾於有誅而無賞若夫陳氏之禮記蔡氏之尚書考證尤疎其視三子又瞠乎後矣余雖俗吏然頗留意經學向在京邸曾為四傳偶筆藏之笥中無何出守南安旋以芻牧之役攬轡沙漠道遙無人之境應酬既絕神志俱清遂於旅次著讀易辨疑歸署後



復以簿書之隙著詩序參朱尚書一得錄說禮正誤及四傳續筆通計六種十卷諸所論定大段皆箋註之所未協者其所已協則不概及焉夫程朱胡蔡數君子皆有宋大儒學問人品卓然名世陳氏雖罕所著見然戴記紛雜最稱難治乃能酌衷羣說以補有宋諸賢所弗逮則亦元儒之表表者余之謏劣何敢妄為異議顧思說經者初非炫其才智以與前人爭勝也蓋將出其意中之所安以發明先聖之微言奧義而已晦菴言易固嘗與伊川左其言詩又極詆毛公之謬康侯之於三傳亦往往互有從違夫豈好為異議哉亦各抒其所見云爾今使余之說果無當也然意在明經或亦可以無惡於君子果有當也竊謂諸賢有知必且輟然色喜曰是善起予一如仲尼之樂得子夏焉是則余所恃以告無罪者也

右五經總義類

論語疏十五卷

唐永年賈公彥撰

中庸說一卷

金磁州趙秉文撰

刪集論語解十卷

同上

刪集孟子解十卷

同上

大學明解一卷

明成安李果撰

四書鐸

明永年申佳允撰

文安之序云尼山垂教萬世木鐸一語被儀封人明眼覷破申子孔嘉適領是邑甫越期政成火憲水藏百職畢舉公餘之暇偕邑之博士弟子員修解頤之樂送難抉疑祗而不倦因出舊所手輯聞且見者若干卷公之同志顏曰四書鐸義固有所取焉爰問序於不佞不佞為卒業而心善之輒然曰余何以益子乎無已則為之進一解曰夫道之可聲聞入者非其至者也孔嘉苦心此道幾山采之幾田穫之比綴而書壤吾知其為粟而木吾知其為貨也就中獨得之契旁皇楮墨際者不尚有躍如心目間者乎謂予不信問之輪扁此後設誠致力行其所明吾見前日之殘朱剩瀋將化而為今日之豐功豔績也孔嘉於此當

作何觀則又不揣為諸士進一解曰鐸者百舌之率也至音聞闐不必煩蜀山之桐自振雲漢誠耳其聲者勿以蕩聽鉅則橫塞之蔽除矣勿以嫌聽小則充詹之益來矣勿以危聽清則豁極之徑荒矣勿以下聽濁則特怒之禍解矣孔嘉之專心志而從事此也大舉小拈冷挑忙點歸於留魚去乙聚燭為明學者苟相為汗漫昧厥指歸無論缶醯黃蚋輻輳有酸且恐煮石紛紜終年不爛雖千鍾大呂辰考酉擊何球兩荷葉乎鐸之為器也有音而無字因其所有而用其所無謂余不信視籟與竽有能往不假道來不假道則可謂無畏矣讀是書者於此更當作何觀抑聞之成身者知之盛者也知莫大乎學利人者義之備者也義莫大乎教教之入人深者音其最也音通於政而移風平俗胥有關焉音至於鐸而音至矣孔嘉於催科撫字中作此恢游伎兩較漢循良以經術飾吏治者又進一格余且愧知孔嘉不盡也於是喜而弁其首

四書集註考

明永年劉慶孫撰 永年志

大學膚見一卷

明永年王立極撰 經義考

四書一得

明雞澤郭恕撰 雞澤志稿

四書說註厄詞十卷

國朝永年胡在角撰 舊志

四庫全書提要編雖以說註為名然頗因以講學尚不似鄉塾講章全為時文而作然亦未全脫坊刻之窠臼蓋其用力之始從講章入也

四書所得隨錄

雞澤王鍾信撰 有傳鈔本

是書由雞澤賀教諭家駿採訪共十七冊無卷數內有四書日記一冊查隨錄題籤有十八冊內闕二冊大旨採集諸家講解闡發書義間有為作時文計者博而不純也

四書管見一卷

永年高甲撰 有刻本

劉毓柟序首篇聖學源流考已得為學之大凡四十六條將四子書中精義互相引證極見發明曹秉哲

序云剖析妙義時得真諦旨約言該是無意於著書而有裨於行己也

右四書類

樂論十四篇

魏邯鄲劉劭撰

樂錄

國朝威縣劉調贊撰

黃鐘考

邯鄲宋之傑撰

樂補亡圖注十卷

磁州楊方晃撰

右樂類

廣雅十卷

魏清河張揖撰

四庫全書提要揖字稚讓清河人太和中官博士其名或從木作揖然證以稚讓之字則為揖讓之揖審矣後魏江式論書表曰魏初博士清河張揖著卑倉廣雅古今字詁究諸卑廣增長事類抑亦於文為益者

也然其字詁方之許篇或得或失矣是式謂卑倉廣雅勝於字詁今卑倉字詁皆久佚惟廣雅存其書因爾雅舊日博採漢儒箋注及三蒼說文諸書以增廣之於揚雄方言亦備載無遺隋祕書學士曹憲為之音釋避煬帝諱改名博雅故至今二名並稱實一書也前有揖進表稱凡萬八千一百五十五文分為上中下隋書經籍志亦作三卷與表所言合然注曰梁有四卷唐志亦作四卷館閣書目又云今逸但存音三卷憲所注本隋志作四卷唐志則作十卷卷數各參錯不同蓋揖書本三卷七錄作四卷者由後來傳寫析其篇目憲注四卷即因梁代之本後以文句稍繁廣雅之文皆具在十卷煩碎復併為三卷觀諸家所引異矣然則館閣書目所為逸者乃逸其無注之本所謂存音三卷者即憲所注之本仍為十卷則又後人析以未嘗逸亦未嘗闕惟今本仍為十卷序稱音字改反為以合唐志耳考唐元度九經字樣序稱音字改反為切實始於唐開成間憲雖自隋入唐至貞觀時尚在然遠在開成以前今本乃往往云某字某切頗為疑竇殆傳刻臆改又非憲本之舊歟

藝文略 經部

埤倉三卷

魏清河張揖撰  
隋書經籍志

古今字詁三卷

同上

隋書注云梁有難字一卷  
錯悞字一卷並張揖撰亡

三蒼訓詁二卷

同上

舊唐書經籍志

字略五篇

北齊列人宋世良撰  
北齊書本傳

四書音攷

明成安李果撰  
舊志

右小學類

史部

漢書音義九卷

魏廣宗孟康撰  
舊唐書經籍志

案隋書經籍志史部梁有漢書孟康音九卷亡當卽

此書

漢書司馬相如傳注一卷

魏清河張揖撰  
漢書敘例

右正史類

五代通錄六十五卷

宋宗城范質撰  
宋史藝文志

陳振孫曰以實錄繁  
冗節略而成此書

宋太祖實錄五十卷

宋肥鄉李沆等修  
同上 舊志誤作太宗

右編年類

晉朝陷蕃記四卷

宋宗城范質撰  
文獻通考

晁公武曰質石晉末在翰林爲出帝草降虜表知其  
事爲詳記少主初遷於黃龍府後居於建州凡十八  
年而卒

大中祥符降聖記五十卷目三卷

宋肥鄉李維撰  
宋史藝文志

御書十卷

宋成安王廣淵編  
宋史本傳

三變記

明肥鄉張懋勤撰  
舊志

右雜史類

四科奏議

明成安張潤身撰  
畿輔人物考

紫山奏議八卷

明永年胡瓚撰  
分省人物考

明山疏略四卷

明永年連鑛撰  
舊志

疏草十卷

明永年胡應文撰  
同上

司馬司農奏議二十卷撫遼奏議十卷

明肥鄉張學顏撰  
舊志參肥

鄉志

孝友堂奏議書牘公移六十二卷

明磁州張鏡心撰  
舊志

撫漕奏議兩按摘略

明曲周路振飛撰  
同上

鹽政奏議四卷督餉奏議

國朝曲周王顯撰  
舊志參縣志

右奏議類

宋氏別錄十卷

北齊列人宋世良撰  
北齊書本傳

魏公家傳三卷

宋宗城范質撰  
宋史藝文志

桑維翰傳三卷

同上

守令懿範四卷

明永年蔡國熙撰  
舊志

四庫全書存目提要編是編乃其官蘇州府知府時輯古  
來守令事迹自周至元分儒牧循牧二類儒牧自子  
游而下三十人循牧自公孫僑而下一百一十人前  
有皇甫汭序稱儒可以包乎循而循未必皆合於儒

體用之間蓋有辨焉云云夫儒者之學明體達用道德事業本無二源歧而兩之殊為偏見且唐韓愈宋歐陽修所學不甚相遠而列愈於儒牧列修於循牧亦不知其以何而分楊簡傳陸氏之學黃震傳朱子之學所著之書釐然具在乃升簡於儒牧以繼陸氏而不升震於儒牧以繼朱子豈非未見日鈔耶循名失實尊儒而不知所以尊徒成其門戶標榜而已

巡邊錄八卷

明永年胡瓚撰分省人物考

夷齊志六卷

明永年白瑜撰舊志

四庫全書存目提要云此書乃因張玘夷齊錄損益而成所載視舊錄加詳

三事錄世恩錄考績承恩錄

明廣平馬呈書撰舊志

兩浙名賢錄

明肥鄉賀君恩分纂肥鄉志

列人書三卷廣武靈杰考八卷

明肥鄉張懋勤撰舊志

案縣志懋勤著有籌時管測等書皆有經濟

孔子年譜五卷

國朝磁州楊方晃撰舊志

四庫全書存目提要云是書中三卷為年譜以天地人分紀之其前一卷曰卷首末一卷曰卷尾中間於史記世家歷聘紀年闕里舊志諸書頗有糾正然註太冗瑣又參以評語皆乖體例至卷首本祖庭廣記作麟吐玉書圖殊未能免俗卷尾泛引雜史為身後異蹟如魯人泛海見先聖七十子游於海上及唐韓滉為子路轉生諸事連篇語怪尤屬不經矣案舊志楊方晃有聖子世譜二卷孔門弟子考二卷四書清賢錄十卷不知存佚

孔子生曰說一卷

邯鄲楊遺白撰舊志

雲陽政略八卷

肥鄉賀應旌撰肥鄉志

海岱日記一卷

磁州張榕端撰舊志有傳刻本

四庫全書存目提要  
命祭告所作以是年正月出都登泰山歷東鎮沂山  
東海往返凡四閱月逐日記其道路所見附以詩歌  
於山川古蹟無所考證而工於點綴景物敘致時有  
可觀其詩則已刊入寶  
齋堂集此為複出矣

申端愍公年譜一卷  
永年申涵光撰  
是編刻在旌忠錄

申鳧盟年譜一卷  
永年申涵煜涵盼補輯  
畿輔叢書鳧盟申涵光之字是編

王棘亭年譜  
雞澤王鍾信撰  
有鈔本末四年其門人邢化明等補注

武秋瀛年譜一卷  
永年武澄清撰  
子用章校補付梓

武酌堂年譜一卷  
永年武汝清撰  
有鈔本

右傳記類

邕管記三卷  
宋宗城范昺撰  
宋史列傳

資暇錄十五卷  
金磁州趙秉文撰  
金史本傳

光裕錄  
明永年胡應聘撰  
舊志

祥刑錄  
明肥鄉郭崇嗣撰  
同上

治郡事宜書  
明永年蔡國熙撰  
同上

遊山記一卷  
明成安王家瑞撰  
同上

南遊記  
國朝威縣高凌雲撰  
威縣志

蘿圖隨寄一卷  
永年武汝清撰  
有傳鈔本

自序云秋曹九載得管理提牢廳事其任甚鉅  
其事實簡謹將上班後所作為者筆之簡端

西甯紀事一卷蘭州紀事一卷  
同上  
有傳鈔本

咸豐元年隨將軍薩迎阿赴甘肅查辦事件時著皆日記之類又有湟中出使記一時所作

長安春夢一卷家居憶舊錄一卷同上有傳鈔本

右載記類

關東風俗傳三十卷北齊列人宋孝王撰北齊書本傳

史言初名別錄二十卷會平齊後更廣見聞改是名勒成三十卷舊唐書經籍志作六十三卷

龍虎山志三卷元清河元明善撰元史列傳

四庫全書存目提要云是書乃皇慶三年明善官翰林學士時奉敕所修然原本體例不可復考惟存延祐元年程鉅夫序及吳全節進表此本載山川建置人物道侶並累朝制敕藝文頗為龐雜殆已多所竄亂非其舊矣

保甯志明磁州紀純撰舊志

治河諸篇明成安蔡可賢撰同上

右地理類

都官考課七十二條說略一篇魏邯鄲劉仰撰三國志本傳

刑統宋宗城范質撰宋史本傳

史言質以律條繁冗輕重無據吏得因緣為奸奉命詳定是為刑統

續通典宋肥鄉李維撰宋史李沆附傳

邦計彙編一卷同上學海類編

四庫全書存目提要舊本題宋李維撰是書載曹溶學海類編中實册府元龜邦計一門之總敘案晁公武讀書志載修册府元龜時預修者十五人維居第四又載初撰編敘諸儒皆作真宗以體制不一遂擇李維錢維演陳彭年劉筠夏涑等付楊億竄定其剽剗此敘說題書名而以為維之所撰蓋以此云



貞觀政要申鑒金磁州趙秉文撰 補三史藝文志

君臣政要同上 金史本傳

史言秉文同楊雲翼共集 自古治術為一編以進上

龜鏡萬年錄金磁州趙秉文等編 補遼金元藝文志

大定治績元永年王磐撰 元文類

磐以金有天下凡九帝共一百二十年其守成之善者莫如世宗謹就實錄中摭其行事一百八十餘條於至元二年同徐隆王

千秋日鑑錄明雞澤劉誠撰 舊志

鹽法議明永年蔡國熙撰 同上

會計錄明肥鄉張學顏撰 明史本傳

營田議明肥鄉張應麒撰 舊志

籌邊要略明永年趙夢麟撰 永年志

興平倉條議江防條議國朝曲周王顯撰 王氏遺書

黃浦因利編邯鄲安貞吉撰 畿輔叢書

增補洗冤錄雞澤齊祖望撰 雞澤志稿

右政書類

讀史摘要明永年申佳允撰 申氏遺書

自序云二十一史史繁矣廢寢食窮歲月讀未必竟即竟矣亦未必記憶也多亦奚為予甚苦之偶繙全帙摘數條付涵光抄錄毒厥梓俾讀史者心眼爽然曰某人必傳某事必不朽某議論孤行於上下古今必不可磨蝕詩三百一言以蔽之曰思無邪矧茲八十三條何必不蔽二十一史也始漢終宋邈遠之與

藝文志 史部

冗蕪概刪焉總以存其要者云爾

讀史辨惑 國朝威縣王建衡撰

四庫全書存目提要云是書成於康熙四十一年雖以讀史為名而考其所引實皆坊刻鳳洲綱鑑也

通鑑評語五卷 永年申涵煜撰

讀史末議 邯鄲宋之傑撰

史籟 永年申涵盼撰

右史評類

子部

荀子二十卷 周趙人荀况撰

漢書藝文志作三十三篇隋書經籍志舊唐書經籍志作十二卷

四庫全書提要漢志儒家載荀卿三十三篇王應麟考證謂當作三十二篇劉向校書序錄稱孫卿書凡三百二十三篇以相校除重複二百九十篇定著三十三篇為十二卷題曰新書唐楊倞分易舊第編為二十卷復為之註更名荀子即今本也考劉向序錄卿以齊宣王時來游稷下後仕楚春申君死而卿廢然史記六國年表載春申君之死上距宣王之末凡八十七年史記稱卿年五十始游齊則春申君死之年卿年當一百三十七矣於理不通晁公武讀書志謂史所云年五十為年十五之譌意其或然宋濂荀子書後又以為襄王時游稷下亦未詳所本總之戰國時人爾其生卒年月已不可確考矣况之著書主於明周孔之教崇禮而勸學其中最為口實者莫過於非十二子及性惡兩篇王應麟困學紀聞據韓詩外傳所引卿但非十子而無子思孟子以今本為其徒李斯等所增不知子思孟子後來論定為聖賢耳其在當時固亦卿之曹偶是猶朱陸之相非不足訝也至其以性為惡以善為譌誠未免於理未融然卿恐人恃性善之說任自然而廢學因言性不可恃當勉力於先王之教故其言曰凡性者天之所就也不可

學不可事禮義者聖人之所生也人之所學而能所  
 事而成者也不可學不可事而在人者謂之性可學  
 而能可事而成之在人者謂之偽是性偽之分也其  
 辨白偽字甚明楊倞註亦曰偽為也凡非天命而人  
 作為之者皆謂之偽故偽字人旁加為亦會意字也  
 其說以合卿本意後人昧於訓詁誤以為真偽之偽  
 遂譁然培擊謂卿茂視禮義如老莊之所言是非惟  
 未睹其全書即性惡一篇自篇首二句以外亦未竟  
 讀矣平心而論卿之學源出孔門在諸子之中最為  
 近正是其所長主持太甚詞義或至於過當是其所  
 短韓愈大醜小疵之說要為定論餘皆好惡之詞也  
 楊倞所註亦頗詳洽唐書藝文志以倞為楊汝士子  
 而宰相世係表則載楊汝士三子一名知溫一名知  
 遠一名知至無名倞者表志同出歐陽修手不知何  
 以互異意者倞或改名  
 如溫庭筠之一名岐歟

虞氏春秋十五篇

周趙相虞卿撰

人物志三卷

魏邯鄲劉劭撰

四庫全書提要此書未有宋庠跋云據今官書魏志作  
 勉劭之劭從力他本或從邑者晉邑之名案字書此  
 二訓外別無他釋然俱不協孔才之義說文則為仰  
 音同上但召旁從耳耳訓高也李舟切韻訓美也高  
 美又與孔才義符揚子法言曰周公之才之仰是也  
 所辨精核今從之其註為劉昞所作昞字延明燉煌  
 人舊本名上結銜題涼儒林祭酒蓋李暲時嘗授是  
 官然十六國春秋稱沮渠蒙遜平酒泉授昞祕書郎  
 專管註記魏太武時又授樂平從事中郎則昞歷事  
 三主惟署涼官者誤矣昞書凡十二篇首尾完具晁  
 公武讀書志作十六篇疑傳寫之誤其書主於論辨  
 人才以外見之符驗內藏之器分別流品研析疑似  
 故隋志以下皆著錄於名家然所言究悉物情而精  
 覈近理視尹文之說兼陳黃老申韓公孫龍之說惟  
 析堅白異同者迥乎不同蓋其學雖近乎名家其理  
 則弗乖於儒者也昞註不涉訓詁惟疏通大意而文  
 詞簡古猶有魏晉之遺漢魏叢書所載惟每篇之首  
 存其解題十六字且以卷首阮逸之序譌題晉人殊  
 為疏舛此本為萬曆甲申河間劉用霖所刊  
 蓋用隆慶壬申鄭昞舊版而修之猶古本云

子部

女論語十篇

唐清河宋若莘撰  
唐書宋若昭傳

楊子發微一卷

金磁州趙秉文撰  
補遼金元藝文志

文中子類說一卷

同上

載道集觀物外篇

元廣平何榮祖撰  
補遼金元藝文志

中語心語廣道詮根心解與學社編

明永年宋學道撰  
畿輔人物考

聖學心脈

明曲周聶雲翹撰  
舊志

小學摘義

明成安李果撰  
舊志

三樹齋語錄

明曲周路振飛撰  
同上

典謨遺旨

明雞澤劉誠輯  
畿輔人物考

是編取漢唐宋詔誥章表可為訓  
者作典謨遺旨通志作遺音

性理提綱

明磁州楊濟撰  
舊志

理學集要

明肥鄉賀君恩撰  
肥鄉志

求正錄默識篇知非解

明肥鄉張宗孔撰  
同上

荆園小語一卷荆園進語一卷

國朝永年申涵光撰  
申氏遺書

孫奇逢序云小語者申子鳧盟之所著也夫語豈有  
小大哉語期於當理而已矣理豈有小大哉洒掃應  
對即精義入神之事鄉黨一篇記聖人衣服飲食揖  
讓寢處而聖人之精神面目合盤托出即曾子所稱  
江漢以濯秋陽以暴子貢有若自生民以來未有夫  
子宰我賢於堯舜夫豈有加於此哉理固無小大也  
鳧盟生平極力自淑以淑其兩弟今兩弟皆自立而  
鳧盟之苦心積慮闔歷深而動忍熟荆園一編雖小  
語實至語也語不從自己心性中經涉歷練而徒為  
高遠深微之論以謾人聽聞此最學人之所當痛戒  
也鳧盟益矣鳧盟自言真理學從五倫作起大文章  
自六經分來噫此小語云乎哉

藝文略 子部

冀如錫序云鳧盟申先生端愍公冢嫡方成童時即  
 恥貴介之習岸然以古人自期古文遡韓柳歐蘇而  
 進奪史遷之席詩本諸性情形為歌詠出入晉魏唐  
 宋諸名家直接三百篇之遺響而超明七子之上海  
 內皆知先生之進於詩文也及時變代更慨然有遺  
 世棄物之志迨世不可棄物不可遺乃本其心經心  
 得之餘著為接物處事之則荆園小語一書以之持  
 身以之教家以之垂訓天下後世不越人倫日用之  
 常而備懲忿窒欲遷善改過之法至於晚年超然名  
 迹之累篤意躬行實踐之努力用省察克治之功或  
 因耳目睹記而發其真是或因經史傳聞而抒其新  
 得要所以明其志之所期據其學之所至日新又新此  
 進語之所以成也進語者進於小語也顧自量精力  
 尚強祈更有進未遽問世而大限告終此書乃出使  
 天復假數年之算其進甯可量乎  
 若先生者庶幾乎自強不息者矣

幼學定式

永年楊文華撰

省心短語一卷

永年申涵煜撰  
申氏遺書

郝氏寤言二卷

永年郝淵撰  
有傳鈔本

是書小北汪村生員朱孔揚采進有順治丙申自序  
 又有道光辛丑鄭東皋序其自序云非敢妄議楊子  
 雲司馬溫公之非非敢妄補邵康節朱文公之闕第  
 七夕二宵之夢若有神異及其寤也因著易策虛除  
 辨既又推其端委述為是編故統名之曰寤言非敢  
 云覺後語也聊以為獨寐寤言云爾  
 圖洛書象數下篇  
 多語錄常言也

西巖贅語一卷

永年申居鄭撰  
申氏遺書

右儒家類

龐煖三篇

周趙人龐煖撰  
漢書藝文志

右兵家類

處子九篇

周趙人處子撰  
漢書藝文志

漢書藝文志

藝文志

子部

子部

法論十卷

魏邯鄲劉邵撰  
隋書經籍志

案舊唐書經籍志有劉氏法言十卷當卽此

律略論五卷

同上  
舊唐書經籍志

史言邵與議郎庾疑荀詵等定  
科令作新律十八篇著律略論

例格一百八十卷

元磁州高謙纂  
畿輔通志

至元新格

元廣平何榮祖撰  
元史本傳

大德律令

同上

右法家類

蔡癸一篇

漢邯鄲蔡癸撰  
漢書藝文志注云宣帝時以言便宜至宏農

太守師古曰劉向  
別錄云邯鄲人

古今農桑輯要

元臨洺吳鼎纂輯  
永年志

案 四庫提要總目此書乃元世祖時撰前有永年

王磐序末言吳鼎或鼎當時亦任分纂役也

右農家類

海上集驗方十卷

唐磁州崔元亮撰  
唐書藝文志

經心錄十卷

唐清漳宋俠撰  
舊唐書本傳

傷寒纂類

一統志作  
傷寒纂要

四卷改證活人書二卷傷寒論三

卷鍼經一卷醫學啟元

金洛州李慶嗣撰  
補遼金元藝文志

銅人鍼經密語一卷瘡瘍經驗全書十二卷標幽賦指

迷賦各一卷

元肥鄉竇默撰  
補遼金元藝文志

案肥鄉志默有外科全書醫論無卷數當在此經驗全書十二卷內

校補衛生寶鑑

明成安李果撰  
分省人物考

家塾事親五卷

明肥鄉郭晟撰  
肥鄉志

晟孫崇嗣後序云此余七世祖龍江公之所著也海內士夫愛其切於日用多梓行置前後不錄而不知為誰何氏之書余在楚藩司署中見此板頃守固原又見此板因重梓廣布以成先志龍江老人自序曰古人以醫之用藥如將之用兵存亡以之不可苟也又曰必誠必敬主一無適庶無不效之藥亦無不去之病苟或無恆為心鹵莽是猶置千金如瓦礫視死生為末節望其有濟不亦難乎

胎產須知救急良方

國朝永年劉敬齋著  
永年志

痘疹精要集

永年張希載著  
同上

臨症方脈論一卷

永年胡大中撰  
有傳鈔本

是編自道光二十六年起迄同治六年止凡遇奇變之症敘其病之原委用藥之次第筆之於書後錄偏方數十類亦皆治奇難症而方不經見者

續增醫方集解六卷

永年呂豐年撰  
有鈔本

首卷列治洋煙癖藥方洞悉源流頗中竅要餘有治疾經驗者亦有鈔集成方者體例頗雜蓋隨手錄出也

石醫家類

天保歷

北齊列人宋景業撰  
北史李廣為之序

皇極經世補注

明雞澤劉誠撰  
舊志

七政考

國朝邯鄲宋之傑撰  
舊志

陽宅三要地理五訣 磁州趙廷棟撰

石象數術數陰陽類

慎子一卷 周趙人慎到撰

漢志同 四庫全書提要到趙人中興書目作瀏陽人陳振孫書

錄解題曰慎到趙人見於史記瀏陽在今潭州吳時始置縣與趙南北了不相涉蓋據書坊所稱不知何謂也則稱瀏陽者非矣明人刻本又云到一名廣案陸德明莊子釋文田駢下註曰慎子云名廣然則駢一名廣非到一名廣尤舛誤也莊子天下篇曰慎到棄職去已而緣不得已洽汰於物以為道理曰知不知將薄知而後鄰傷之者也譏髀無任而笑天下之向賢也縱脫無行而非天下之大聖椎拍輓斷與物宛轉舍是與非苟可以免不師智慮不知前後魏然而已矣推而後行曳而後往若飄風之還若羽之旋若磨石之隧全而無非動靜無過未嘗有罪是何故

夫無知之物無建己之患無用知之累動靜不離於理是以終身無譽故曰至於若無知之物而已無用賢聖夫塊不失道豪傑相與笑之曰慎到之道非生人之行而至死人之理適得怪焉云云是慎子之學近乎釋氏然漢志列之於法家今考其書大旨欲因物理之當然各定一法而守之不求於法之外亦不寬於法之中則上下相安可以清淨而治然法所不行勢必刑以齊之道德之為刑名此其轉關所以申韓多稱之也其書漢志作四十二篇唐志作十卷崇文總目作三十七篇書錄解題則稱麻沙刻本凡五篇已非全書此本雖亦分五篇而文多刪削又非陳振孫之所見蓋明人摺拾殘剩重為編次觀孝子不生慈父之家忠臣不生聖君之下二句前後兩見知為雜錄而成失除重複矣

公孫龍子三卷 周趙人公孫龍撰

四庫全書提要案史記趙有公孫龍為堅白異同之辨漢書藝文志龍與毛公等並游平原君之門亦作趙人高誘註呂氏春秋謂龍為魏人不知何據列子釋文龍字子秉莊子謂惠子曰儒墨楊秉四與夫子為



五秉即龍也據此則龍當為戰國時人司馬貞索隱謂龍即仲尼弟子者非也其書漢志著錄十四篇至宋時八篇已亡今僅存跡府白馬指物通變堅白名實凡六篇其首章所載與孔穿辨論事孔叢子亦有之謂龍為穿所紉而此書又謂穿願為弟子彼此互異蓋龍自著書自必欲伸己說孔叢偽本出於晉漢之間朱子以為孔氏子孫所作自必欲伸其祖說記載不同不足怪也其書大旨疾名器乖實乃假指物以混是非借白馬而齊物我冀時君有悟而正名實故諸史皆列於名家淮南鴻烈解稱公孫龍粲於辭而質名楊子法言稱公孫龍詭辭數萬蓋其持論雄瞻實足以聳動天下故當時莊列荀卿並著其言為學術之一特品目稱謂之間紛然不可數計龍必欲一核其真而理究不足相勝故言愈辨而名實愈不可正然其書出自先秦義雖恢誕而文頗博辨陳振孫書錄解題概以淺陋迂僻譏之則又過矣明鍾惺刻此書改其名為辨言妄誕不經今仍從漢志題為公孫龍子又鄭樵通志略載此書有陳嗣古註賈士隱註各一卷今俱失傳此本之註乃宋謝希深所撰前有自序一篇其註文義淺近殊無可取以原

本所有始併錄焉

龐煖二篇 周趙人龐煖撰 漢書藝文志

隨巢子六篇 周趙人隨巢子撰 同 隋書經籍志同

毛公九篇 周趙人毛公撰 同

聊倉三篇 周趙人聊倉撰 同 師古曰嚴助傳作膠倉

典言四卷 北齊廣平荀士遜等撰 隋書經籍志

公孫龍子注一卷 唐永年賈大隱撰 唐書藝文志

資暇錄十五卷 金磁州趙秉文撰 金史本傳

澤畔狂言 國朝肥鄉賀應旌撰 舊志

任軒隨筆一卷 曲周王體健撰 同上

張氏家訓二卷

磁州張榕端輯裔孫王林重刊本

宋舉序云此兩世家訓為司馬公訓太史公太史公訓閣學公者韓茨序云讀滄陽先生兩世家訓士君子立身居官之道盡之矣

課兒文訓一卷

永年申頌撰畿輔叢書目

蕉窗瑣言三卷

磁州楊方冕撰舊志

弄珠集三十二卷

國朝申居鄭撰有傳鈔本居鄭又有西清校餘錄耐

俗軒日記  
易水郝天相序略云西巖兄以國子生校書西清凡中秘圖書罔不披覽校讐之餘因摘取其書說之切於日用而為窮鄉僻野之所不及見者彙輯成書博於古而不戾於今該乎事而不背乎理洵讀書考道者之所宜什襲而珍藏也

右雜家類

皇覽

魏邯鄲劉邵撰三國志

史言黃初中為尚書郎受詔集五經羣書以類相從作皇覽

冊府元龜一千卷

宋肥鄉李維等分纂宋史列傳

四庫全書提要宋王欽若楊億等奉敕撰真宗景德二年詔編修歷代君臣事蹟以欽若提總同修者十五人至祥符六年書成賜名製序周必大文苑英華跋王明清揮塵錄並稱太宗太平興國中修者誤也其書分三十一部有總序又子目一千一百四門門有小序皆撰自李維等六人而竄定於楊億又命孫奭為之音釋其間義例多出真宗親定惟取六經子文不錄小說於悖逆非禮之事亦多所刊削裁斷極為精密考洪邁容齋隨筆謂其時編修官上言凡臣僚自述及子孫追敘家世如鄴侯傳之類並不採取遺棄既多故亦不能賅備袁氏楓窗小牘亦謂開卷皆目所常見無罕覩異聞不為藝林所重夫典籍至

繁勢不能遍為掇拾去誤存實未可概以挂漏相繩  
况纂輯諸臣皆一時淹貫之士雖卷帙繁富難免抵  
牾而考訂明晰亦多可資覽古之助張耒明道雜志  
稱楊億修冊府元龜數卷成輒奏之每進本到真宗  
即降付陳彭年彭年博洽不可欺毫髮故謬誤處皆  
簽貼有小差誤必見至有數十簽億心頗自愧乃盛  
薦彭年文字請與同修其言雖不可盡信然亦足見  
當時校核討論務臻詳慎故能甄綜貫串使數千年  
事無不條理秩然也據玉海所載此書凡目錄十卷  
音義十卷今有目錄而無音義蓋傳寫者久佚之矣

### 右類書類

益堅錄

明永年劉慶孫撰  
舊志慶孫又有雪齋寄筆

直廬雜述一卷

國朝永年申涵盼撰  
畿輔叢書目

譚蔗

同上

存齋雜著四卷

磁州楊方冕撰  
舊志

### 右小說家類

老子孟氏注二卷

魏廣宗孟康撰  
隋書經籍志

老子述義十卷

唐永年賈大隱撰  
唐書藝文志

列子補注一卷

金磁州趙秉文撰  
金史本傳

南華略釋一卷

同上

老子大意

明肥鄉李杜撰  
舊志

老子贅言

明肥鄉李燧庭撰  
同上

陰符經增注一卷

明磁州張鏡心撰  
畿輔叢書裔孫壬林重刻

### 右道家類

### 集部

荀况集一卷

周趙人荀况撰 隋書經籍志荀况集一卷殘缺梁二卷唐

志二卷

孫卿賦十篇

同上 漢書藝文志

劉邵集二卷

魏邯鄲劉邵撰 隋書經籍志梁有光祿勳劉邵集二卷魏

亡一卷

劉遐集五卷

晉易陽劉遐撰 唐書藝文志

元興文集

後魏肥鄉馮元興撰 魏書本傳

司空曙詩集二卷

唐廣平司空曙撰 唐書藝文志

唐才子傳同崇文總目無集字書錄解題宋志作司空文明集宋志全唐詩小傳作三卷舊志作六卷

張祐詩集一卷

唐清河張祐撰 唐書藝文志

唐才子傳作三卷宋志作十卷

劉言史詩十卷

唐邯鄲劉言史撰 宋史藝文志

唐志有言史詩六卷全唐詩小傳無詩字

張蠙詩集二卷

唐清河張蠙撰 唐書藝文志宋史作一卷

范魯公集三十卷

宋宗城范質撰 宋史藝文志郡齋讀書志同

范貴參集十卷

宋宗城范旻撰 宋史范質傳

李若水集十卷

宋曲周李若水撰 宋史藝文志書錄解題作十二卷

四庫全書提要忠愍集三卷李若水撰若水本名若冰欽宗為改今名字清卿曲周人事蹟具宋史本傳書錄解題載李忠愍集十二卷蓋以其追諡名集劉克莊後村詩話作忠烈集當由傳寫之誤宋史藝文志作十卷考書錄解題稱後二卷為附錄其死節時事宋史蓋但舉其詩文其實一也其詩俱有風度而不

失氣格其文以光明磊落肖其為人南宋時蜀中有  
銀本劉子翬屏山集有題忠愍集詩詞極悲壯今原  
集不傳茲就永樂大典中所散見者掇拾編次釐為  
三卷以建炎時誥詞三道附錄於後其子涪跋是集  
云秭歸費守樞為先公作文序能不沒其實今費序  
已佚惟涪跋僅存亦併附諸篇末雖搜羅補綴非復  
蜀本之舊然唐儲光義詩格古雅其集亦哀然具存  
徒以苟活賊庭身污偽命併其詩亦不甚重至於張  
巡所作僅聞笛及守睢陽兩篇而編唐詩者無不採  
錄豈非以忠孝者文章之本耶今若水詩文尙得三  
卷不止巡之兩篇殘編斷簡固瞭然與日月爭光也

文肅經濟編六卷

宋永年李椿撰  
補宋史藝文志

漳川集

金洛州董師中撰

滏水集二十卷外集十卷

金磁州趙秉文撰  
金史本傳

四庫全書提要元好問中州集稱其自幼至老未嘗廢  
書史稱所著詩文三十卷此本乃二十卷與史互異

然篇目完具不似有所佚脫考中州集稱秉文所著  
文章號滏水集者前後三十卷劉祁歸潛志曰趙  
傳道之名晚年自擇其文凡主張佛老二家者皆削  
去號滏水集首以中和誠諸說冠之以擬退之原道  
其為二家所作文及其葛藤詩句另作一篇號閒  
外集以與少林寺長老英粹使刊之故二集皆行於  
世則滏水集本二十卷別有十卷為外集本傳合而  
計之故為三十卷也又曰李屏山教後學為文欲  
自成一體有奇古有時平澹李嘗與余論趙文曰才甚  
高氣象甚雄然不免有失支墮節處蓋學東坡而不  
成者又趙詩多犯古人語一篇或有數句此亦文章  
病又曰趙於詩最細於文頗疏止論氣象李於文甚  
細論關鍵賓主抑揚於詩頗疏止論詞氣才巧故余  
於趙則取其作詩法於李則取其為文法云云今觀  
是集而論之學故長於辨析極所欲言而止不以繩墨自  
拘七言長詩筆勢縱放不拘一律律詩壯麗小詩精  
純多以近體為之至五言古詩則沈鬱頓挫學阮嗣

宗真純簡澹學陶淵明  
以他文較之或不近也

卷瀾集三卷

金滄陽曹珏撰  
明史本傳元好問撰墓表同

鹿菴集

元永年王磐撰  
補元史藝文志

大畜十集

元廣平何榮祖撰  
元史本傳

竹齋集

元磁州安思承撰  
舊志

西巖集二十卷

元邯鄲張之翰撰  
補元史藝文志舊志作三十卷

四庫全書提要之翰元史無傳惟松江府志載之翰至  
元末自翰林侍講學士知松江府事有古循吏風至  
今猶祠於名宦生平著述甚富晚號西巖老人故以  
西巖名其詩清新宕逸有蘇軾黃庭堅之遺文亦頗  
具唐宋舊格其集據松江府志所載本三十卷今於  
永樂大典中蒐採綴輯分體編次釐為二十卷雖當  
時舊本篇頁多寡不可知而約略大數計已得什之  
六七矣永樂大典所有標題張西巖集而核其詩文

實為張起巖作起巖字夢臣濟南人有華峯漫稿類  
稿金陵集尚行於世與之翰截然兩人始當世繕錄  
之人以張西巖集與張起巖集聲音略近故  
隨讀而譌致相淆亂今並釐正各存其真焉

清河集三十九卷

元清河元明善撰  
補遼金元藝文志舊志作三卷

清白堂文集

明廣平郝玠撰  
舊志

郭忠詩文集

明肥鄉郭忠撰  
分省人物考

紫山詩稿四卷

明永年胡瓚撰  
同上

南濱橐

明永年申綸撰  
舊志

案申氏遺書目南濱有引避樞臣記內記嚴東樓權

恣甚悉惜橐本散佚

厚菴文集

明磁州楊濟撰  
磁州志

鈍菴文集

明雞澤劉錫撰  
畿輔通志

燕山漫槁

明永年連鑛撰  
舊志

拙齋文集

明磁州王甯撰  
同上

卧雲漫槁

明廣平馬快撰  
同上

潛軒集

明肥鄉梁桐撰  
肥鄉志

紫岩集

明永年申价撰  
舊志

慎齋槁

明廣平馬偉撰  
同上

繼志堂文集二卷

明永年申儲撰  
同上

春陵集

明曲周一鶚撰  
同上

夢寤集

明成安李齊芳撰  
同上

花萼吟焚遺集

明成安蔡可教撰  
成安志

沼南詩文集十四卷

明邯鄲張成教撰  
邯鄲志

燕石稿十卷

明肥鄉郭崇嗣撰  
畿輔通志

西山遊草

明永年趙夢麟撰  
永年志

春臺文集

明永年蔡國熙撰  
舊志

輓轡山人集

明廣平馬在田撰  
同上

半舫集十四卷

明曲周劉榮嗣撰  
畿輔叢書

成克鞏序略云曲周大司空劉公簡齋品望識略負一時之選而絕不肯隨俗為俯仰中官亂政之日雖素有聲譽者每不惜褻裳以就而公自持蘄如其與諸同志及先文穆公往復書幽憂鄭重具有宗社安危之大慮迨受命治河河之難治也久矣公以平臺召對天語諄詳遂叱馭河干躬親畚鍤念洳河瀕漫

版築難施必先挽黃而後泐可治公豈不知任事之難而羣輩之議其後哉念陵寢民生之至重是以置毀譽得失於度外而不辭也乃費省而工成工成而謗起公沒之後公之孫雲麓克繼前烈歷官州邑皆有聲乃從兵火煨燼之餘搜理殘麓得公文若干篇以付諸梓予受而讀之而恍然見公之精神意氣尚不泯於人間而當年隨刊之績則又與日星昭而江河流者使公得更展其才猷為國家效半臂之力太平之業未始不可望而卒擠公以至於死抑亦見天之將亡人國而特生若輩以耗一時之人才然公雖鬱鬱以沒而天下人士追遡風流莫不稱引簡齋先生以為重而雲麓宦轍所至咸相慶先生有孫以弗墜家學視彼讒人所得孰與多哉故公之人傳而公之文自傳也而非雲麓則莫與傳公之所未傳也

案舊志作簡齋詩鈔縣志作簡齋全集詩鈔今有傳

本作文選四卷詩選十卷

度青吟覺非草

明成安陳廷謨撰成安志

案舊志又有義畫管窺巡方講義河東及按蜀疏草

集略均無卷數

吟堂詩笑二卷

明磁州王立道撰舊志

混塵集

明邯鄲馬壯撰同上

玉岡文集

明永年劉尙卿撰同上尙卿又有家訓詩脈等篇

春香園橐

明磁州常守信撰同上

春香軒集二卷綠芹園集二卷一方亭集二卷日燭言

詩文集一卷

明磁州楊性魯撰有傳刻本磁州學官采進

自序云余自少性僻往往負氣驚直不能下人一任高平令輒以不善事上官中蜚語詿吏議坐是憤不復出閉扉操管勉強學為詩文然而非詩文也第藉以消鬱抑度歲月爾高平趙公由延安司理來守吾



郡趙公者余令時所推服而尊禮者也雅知余乃不揣出所刻詩文示之公覽而笑曰近日業此乎差足不落寔已一日謂余曰曩詩文彙兒輩攜歸鄉士子聞之曰楊公在吾邑不聞詩不聞文也今且詩且文儻亦去政而即學耶僉欲一觀願得原板印而致之余不覺赧然自失也曰昔以不能事人故被鑠金之口幾及於禍賴貴邑諸友走數百里外謁當道白余之寃迄今念之尚有餘愧陋哉茲刻何當於諸友復以貽之笑乎顧公之命則不敢違也乃蒐原板并近詩文若干首付公梓之而祝曰為我謝諸友茲刻皆以消鬱抑而度歲月者幸無以詩文繩而或求多也因自序其首以志高平土風之厚如此

草根吟

明成安喬宮撰  
舊志

世麟堂文集十卷

明肥鄉張承祚撰  
同上

愛夢集七卷戴盧集十六卷蛩吟三十八卷

明肥鄉張懋勤撰

同上

郢中草垂釣草天從草澤畔草

明成安吳維東撰  
同上

大柳集

明肥鄉呂元聲撰  
同上

元齋社吟集

明雞澤陳厚撰  
同上

西田文集

明雞澤郭都撰  
同上

澹齋遺藁

明雞澤康應乾撰  
雞澤志

鶴林集一卷東堂詩一卷

明肥鄉張錫祚撰  
舊志

隆慮詩集十卷

明肥鄉張懋勤撰  
同上

聶水部文集

明曲周聶雲翹撰  
同上

張懋忠詩集三十卷文集二十五卷

明肥鄉張懋忠撰  
同上

遂園詩集

明永年馬任遠撰  
同上

廣平府志

卷三十四

藝文略

集部

弄石齋詩集

明邯鄲李光遠撰  
同上

太樸山人稟

明曲周聶明連撰  
同上

遊粵吟

明磁州楊承誨撰  
案舊志又有唧唧吟每每草烏烏草等篇

遽園藁略

明威縣王建極撰  
舊志

遣興吟集

明邯鄲溫性生撰  
邯鄲志

木石居稟

明永年鄭之望撰  
舊志

案申涵光所撰墓志作木石居寤言

白玉齋稟

明曲周路振飛撰  
同上

永譽稟于役吟

明曲周秦廷奏撰  
同上

鷓鴣秣陵集

明威縣高登雲撰  
同上

案縣志登雲又有論語百篇詩讀史詩

燕遊草筒園小草石虎齋集

明磁州楊立撰  
同上

雲隱堂文集三十卷詩集十卷

明磁州張鏡心撰  
磁州志有傳刻本

雲隱堂文錄十卷

同上鏡心子冲輯刊  
裔孫壬林重刻

雲隱堂詩錄二卷

同上鏡心子潛輯刊  
裔孫壬林重刻

申端愍詩集六卷

明永年申佳允撰  
舊志作三卷有傳刻本

四庫全書提要云佳允為杞縣令時死守孤城卒擊破流寇掃地王其經濟有足稱者官考功時以舉劾公正忤溫體仁降謫及官寺丞方出巡牧場李自成圍京師勢可避匿或勸之弗入佳允流涕曰固知京師必不守然吾君在焉安危共之何所逃避於甲申三月十二日崎嶇還京十九日死於國難其氣節亦震耀千古是集為其子涵光所編卷首有家傳稱其於詩好稱李夢陽何景明今觀所作於何李頗不相似

大抵直抒寫胸臆如其為人但體格尙未成就且不免浸淫明末纖仄之習然凜然剛正之氣足使後人起敬不敢復以詩格繩之言以人重焉可沒也舊本首載孟津王鐸序不著年月核其所述蓋作於崇禎初佳允官杞縣時後人重刻仍錄以冠首然鐸何如人乃操筆弁冕佳允詩今特削之俾無爲佳允辱焉漳浦黃道周序云數年間余聞汴杞人道孔嘉公能撫綏其民余曰此其事應爾也又道公歲武比類百則以逆民休余曰此危急之必飭也及見公之詩始詠歎俛仰不能自已夫綏民而劇且勞休民而業用之十軌爲里十連爲鄉無有蠹敗在衆人皆以爲赫赫而余反不以爲深微者其故何耶曰此功利不干其意毀譽無所闕固其從容之意出焉優游無爲有全氣也天下之患莫大於神不足以御動而訟獄也錢穀也甲兵也做做於衡石矛鋌桎梏之間而能宅神明以餘地否耶先生欲國之有紀也有禦外之術守疆之備乎則可也若動氣之和怒不喜譬牧牛然平不多方於己志不亂其食息十年前海內平無寇燹又何事斧鉞刀墨之爲哉嗚呼此治化之無爲而不處乎物也詩道亦然而必曰時詩之務全氣

破碎相然於詭合以與有形相求其於元聲外矣孔嘉之鼓大籥於國家斯其本也不然何以謂之深微自實而與劇且勞者異也

案端愍所著尙有文集一卷君子亭集和九齋文彙今多散佚

益堅詩鈔 明永年劉慶孫撰 縣志

按浙草蓮馨齋詩集 國朝曲周王顯撰 舊志

伏櫪齋詩集 永年胡鳳閣撰 畿輔詩傳

胡福宏序云叔氏才分殊絕耆古學先大司空遺書充棟叔氏搜讀殆盡且融液焉以故識閎思曠落筆如雲湧其光氣直游漢晉間憶天啟乙卯余初廁膠庠叔氏卽食餼於公嗣後大小數十試試輒冠軍二十年間名噪甚至若偶試爲詩麗則清越體具意美其尤異之詞更可中金石而被絃籥居然風雅昔柳

柳州謂文與詩旨義乖離不合秉筆之士恆偏勝獨得罕有兼者若叔氏者不且儼然易古人之難也乎叔氏且晚有事於四方余故彊取之有是刻而為之言

威如堂詩集

永年李芳莎撰

讀騷齋詩集一卷

曲周王體健撰

聰山集十四卷

永年申涵光撰

四庫全書提要聰山集十四卷申涵光撰涵光字孚孟亦作符孟又曰和孟復自號曰鳧盟取與符孟字音近也明太僕寺丞佳允子是編首列年譜傳志一卷次文三卷詩八卷附荆園小語一卷荆園進語一卷皆所作語錄也自序云憶昔十五六時好讀史記國策及蘇長公集以為舉業之助耳非有意於著作也甲申予年二十有六既廢舉業而名心未淨思以文字自見文與詩之間實遲回焉念古人無兼長如史漢之文李杜之詩以彼其才尚專攻於一藝近世名人之集以不兼為恥不止詩文必欲兩擅而種種

諸體無所不備雜而不精未必不緣此矧余才力短弱又寡學問身在草莽無文可作一觴一詠庶以陶寫性情舒我抑鬱因專力於詩上下古今無不窮究其中甘苦一身體嘗之矣性懶不常作十五年僅得詩六百餘篇而予之力盡不能有所進益其後年日以老不耐思索遂絕口不吟至於古文詞實未究心未敢云作也然親申中每以銘誌見委及四方諸賢詩文之序欲則名其間難以概拒間亦涉筆鄙陋淺率略具文形昔殷宗山嘗稱子尺牘謂有蘇長公筆致然亦隨手裁應未嘗存稟料亦不足存也甲寅九日前雨中無事哀集前後所為雜文命小胥彙抄留諸家塾比年多病衰相日增欲少留心性命理學諸書以為晚年寡過計不復措意於語言文字間則此後益當少作矣魏裔介序云余聞申子鳧盟有年矣未及一握手也數過猶龍案頭得讀鳧盟詩數篇為之擊節猶龍曰是未足盡之也曩者天運板蕩滄海橫流余與鳧盟及殷子伯巖誅茅廣羊之間登高長嘯時人莫測儼然杜陵野老與高李二子氣酣吹臺時也今余珥筆祕省而鳧盟方閉戶著書不問人間事吾不能測其學之所涯際矣余又不禁心折

癸巳夏大雨數旬燕趙皆為澤國申子重趼千里訪  
 余燕邸劇譚今昔得以聞所未聞余既晤臆盟乃知  
 詩如其人而詩又不足以盡其人蓋其所蓄者大所  
 養者深非僅僅一泉石膏盲之士也已盡出其詩命  
 余讀之則皆直抒天真不受羈縛澹靜之氣拂拂於  
 筆楮外蓋自成一家言已嗟乎言詩於今日豈不難  
 哉優孟衣冠萬耳一聵歷下竟陵勃谿紛呶誰能去  
 組織雕績之習洗摹擬煩碎之陋以尊其性情於風  
 雅者今臆盟之性情與人遠矣而其才與學又足以  
 濟之高風遠韻寄心霞末雖近於陶靖節孟襄陽一  
 流假使摠其蘊藉以應朝廟燕享征伐禮樂之制其  
 裔皇麟炳册中彪外小儒驚怖咋舌又不知當何如  
 雖然臆盟獨以詩名乎哉自其先端愍公抗節殉難  
 志光日月臆盟至性過人十年以來憔悴之色猶見  
 於眉宇忠孝萃於一家篇什其緒餘耳大陸多欽崎  
 厯落之人然如申子之人與申子之詩者其為可傳  
 無疑也

案臆盟所著刻本有文集三卷詩集八卷其板失稟

存者有觸存一卷慎交錄一卷岱吟說杜清貽堂文

集申伯子近草卧樗老人文鈔等篇

張子詩選一卷

永年張蓋撰  
畿輔詩傳

案 畿輔叢書題作柿葉菴詩集永年知縣夏詒鈺

重刻本 畿輔叢書亦收錄付梓

留耕草堂詩一卷

雞澤殷岳撰  
畿輔詩傳

畿輔叢書同

卧雲齋集

永年李養廉撰  
舊志

積書巖詩選學迂軒稟

曲周劉逢源撰  
畿輔詩傳

畿輔叢書刻其

詩

四庫全書提要積書巖詩選分初集二集後附前後漫  
 興詩各五十首逢源生當明季崎嶇轉徙於江漢淮

海之間故幽憂之語多而和平之韻鮮焉

玉暉堂稟五卷

永年趙湛撰

魏裔介序云近日河朔山林隱士以詩名者首推申  
鳧盟鳧盟固吾性命友也聯和諸篇載之集中其矻  
也余為作傳以示不朽世或稱鳧盟以為浩然和靖  
也而鳧盟之友秋水趙子與余善蓋二十餘年矣岸  
然自命不事家人生產沈酣李杜枕藉三唐其所作  
平曠高遠絕去町畦巉巖若不求勝於人者而蕭然  
沖適自有不可攀躋之處譬如國色天香非以粉黛  
為工薰襲為妍而姍姍其來遺世獨立矣譬如五陵  
桃源沿溪踏沙逶迤而入忽見水綠霞紅峽口天開  
別有世界矣生平刻燭拈鬚各種俱備四游草其一  
種也價重雞林所至之處人爭倒屣而與筠湄楊公  
相契忘言以風雅日相切劇風氣道上蓋不必窺全  
豹而已見其一斑也秋水將赴晉陽過汾水入雲中  
陟雁門弔古興懷縱其遊屐歸而示我其磊落英多  
又不知其何如也雖然秋水與聞大道從事根本之  
學得紫陽之意讀其省心吟則知之矣甯第以詩名

家而已哉

聽雨齋集

威縣高凌雲撰

讀書堂集十卷

磁州張潛撰

杜詩詳解二十卷杜文二卷

同上 裔孫張壬林刻本

四庫全書提要云是編乃其晚年家居所作以千家註  
為本而節其冗複凡稱原註者皆千家註每詩中評  
語及圈點則潛所增入也自稱起己丑迄癸丑閱二  
十四寒暑五易稟而成其用功甚勤然多依傍舊文  
尚未能獨  
開生面

寓甌雜咏歸田詩集

磁州陳聖俞撰

竹邊樓詩草

永年鄭茂撰

申涵光引云子勉深沈善下每事務精尚乃退然如  
不足者詩渾雅似儲潤州蒼藤古木日月渺宵非徑

草盆花可彷彿時有精刻之思出人意表予好誦其  
曉日當窗暖飛塵亂隙光一篇謂前人所未及的是  
浣花先生語勸之刻子勉唯唯且刻且刻十年未果  
也今春來都下同入索其全藁子勉唯唯如故子為  
選其十之一二強付剞劂今天下人人詩人人刻詩  
矣朝脫藁而夕災木者有之子勉詩成十餘年而退  
然若不足不自知其  
可傳是其必傳也夫

深柳堂詩集

雞澤苑育蕃撰  
舊志

敏菴集一卷江航草一卷

永年申涵煜撰  
畿輔詩傳

忠裕堂文集三卷詩集十卷

永年申涵盼撰  
申氏遺書

陳玉璣序云自古翰林而能文章者莫如歐陽修蘇  
軾故其文既重於當時復傳於今日余思二公即非  
翰林其文亦必可貴苟第以翰林為榮也則自古及  
今可榮者何獨二公也申子隨叔連第春官官翰林  
檢討日刻苦為文自記傳書序以及碑銘雜著體無  
不備詞無不工豈非不以向之所云者為榮而有慕

乎二公之所為者耶然吾又聞二公經濟與文章相  
表裏當日建樹卒能如其文之所言今隨叔將第於  
其文求之乎於此亦豈有意乎予與隨叔同舉孝廉  
十年以來朋友之愛過於弟昆故於其文不以誦而  
以規者竊欲附古人之誼相  
與有成知隨叔之不我棄也

尋遠樓詩集

畿輔詩傳有傳刻本  
曲周劉佑撰

舟瓠齋集

磁州楊遺白撰  
畿輔詩傳  
舊志作二卷

撚鬚吟

曲周王涵煥撰  
同上

問津園詩草

曲周王鄰撰  
同上

墨妙堂集

曲周王鄭撰  
同上

素心堂集

雞澤齊祖望撰  
雞澤志藁

敦好堂詩集江南課俊藁杜詩箋釋

永年王宗撰  
舊志

東岩詩草 永年姚昇撰 畿輔詩傳

純白齋詩集一卷 磁州張澣撰 畿輔詩傳

寶齋堂詩集四卷 蘭樵河上草二卷 磁州張榕端撰 畿輔詩傳 舊

志又有歸田藁二卷

四庫全書提要張榕端有海岱日記已著錄寶齋堂詩藁四卷為榕端官內閣學士時所刊皆其康熙己未至己卯之詩前有任邛龐塏序稱其詩和而不迫秀而不纖逸而不肆宛轉纏綿一寫其胸中之趣而未嘗借以宣其喜怒不平之氣頗近其實然婉約有餘遂乏雄渾之氣深湛之思蓋其長在是短亦在是也又河上草二卷榕端康熙庚辰以內閣學士預治河之役至癸未始召還此編皆其四年之中在工次所作前有宋犖序稱其泥塗樵櫓石沈薪卒以塞決乃殊不見其歌詠勤苦之勞而往往道其達天適性之樂今觀其詩雖醞釀不深而和平靜謐犖言蓋不誤云又蘭樵歸田集皆康熙甲申以後歸里

之作其詩直抒胸臆多入香山一派蓋老境優游頽然自放不復以文字為意矣

馳恩堂詩文集 曲周秦益謙撰 舊志

樂道堂文集 雞澤齊祖頊撰 同上

耐俗軒詩集三卷 永年申頊撰 畿輔詩傳 光緒初年縣令夏詒

鈺重刻本增近體詩作五卷頊又有毅園詩集廣絕交編格言鈔

四庫全書提要耐俗軒集三卷申頊撰明太僕寺丞佳允之孫涵光之姪也涵光所著聰山集以杜甫為宗頊詩則惟作古體無近體古體又皆五言無七言大抵源出阮籍詠懷陳子昂張九齡感遇多託意寓言之作而其運思取徑又出入於黃庭堅蘇軾之間頗為拔俗然其間或有縱筆一往傷於快縱者或有故以波峭取姿掩抑示意傷於纖挑者或有一超詣也語傷於實相者瑕瑜互見尚未能一一超詣也

任菴詩集九卷 威縣王建衡撰 畿輔詩傳



腴古齋集一卷磁州孫芝椿撰

積力齋百詠一卷磁州張橋恆撰

退閒堂稟磁州樂玉聲撰

求我堂詩集一卷磁州張壇撰

野心齋小集磁州董昌齡撰

西巖詩稟二卷嶺南詩稟一卷永年申居鄭撰  
有傳鈔本鄭又有西巖

近草耐俗軒日記杜詩  
指掌李逢光為之序

張星五集二卷邯鄲張養奎撰

雞肋集四卷磁州楊方晃撰

案舊志作存齋詩集三卷

味腴堂詩稟永年程玉瑄撰

越游吟燕山草磁州李培深撰

觀善堂詩集永年金振聲撰

深柳堂詩稟四卷肥鄉王心一撰  
畿輔叢書有傳本

清白堂文集三卷吹映音詩集一卷曲周王今遠撰  
縣志有傳鈔本

容膝軒詩草一卷磁州張獻撰

一堂草詩集曲周路步青撰

襲軒集一卷蠡吾閒詠集一卷家居偶吟草一卷永年申永

鈞撰有傳鈔本又著有客窗拾  
唾北歸日記訓子篇均未付梓

綠筠書屋詩稟八卷磁州張錢撰  
有刻本

清簡堂贍稟一卷 磁州張金奏撰 有刻本

敬簡堂贍稟一卷 磁州張金管撰 有刻本

沁香館詩草四卷 成安黃金策撰 有鈔本又有詞草二卷

遺芳草一卷 磁州女史張錫齡撰 有傳刻本

古槐軒文集二卷 永年郝德昌撰 有傳刻本

文多論序兼有公牘文字詩多近體

右別集類

三州倡和集一卷 唐磁州崔元亮撰 唐書藝文志

風雅遺音 明雞澤劉誠撰 是書選楚漢以降詞人之作散見諸書 采其得三百篇之旨者作風雅遺音

廣平詩人集 明成安王家瑞撰 舊志書未見序在康熙志

自序云余嘗欲廣搜博採作唐代詩人通考 嗟此月向未如志於是即吾郡廣平唐詩之可稽者蓋九人焉彙其篇章僭為傳讚輯錄以傳夫高衛尉倡三宴之集劉刺史預九老之會一時盛事千載美談二吟詠不可遺也司空文明張承古張象文百家詩中俱有其集然佚亡過多散見疊出於是收總集之其未盡者尚有俟也張子初原集不存止得其賦三詩最為可惜劉棗強詩云舊業叢臺廢苑東蓋邯鄲人無疑漢末有劉子才或者即其後乎而皮襲美為作墓碑謂不知何許人似未詳考矣舊集十卷今亦不傳僅就所得彙若干首不啻十之一二也此亦就今之廣平九邑之屬而紀之若武城崔氏南和宋氏舊屬郡境而今皆別據亦姑置之不以附會從時制也又九集括以總目而各不相聯俟後有得當續編入夫廣平在燕南魏北正當趙都古今以來照耀宇內豈無道德勳庸足以名世而區區取此詩學以為重乎又漢晉以前宋元以後豈無制作文章足以美傳而區區取此唐人以藉光乎蓋賢哲通載於史

冊而詠歌莫盛於李唐職此故也大抵英物難以消沈精光不可磨滅誦篇什之朗然景丰標之曄如爰加集次用付梓人聊以志吾郡文獻之一端云爾

忠孝詩纂略 國朝雞澤齊祖頊撰

白雲菴唱和集 永年申涵煜撰

磁州人詩十卷 磁州楊方晃編

四庫全書提要是集皆錄磁州之詩自唐迄本朝作者八十餘人得詩千餘首各繫其人之事蹟出處甚詳亦頗有考據然意在表彰未能嚴於決擇其第八卷至十卷悉載方晃及孫濂詩濂亦磁州諸生即較刊磁州詩集者也

申氏拾遺集 永年申居郎撰

張氏文徵 磁州張王林輯 共十七人光緒己丑刻本

右總集類

吉山樂府三卷 元邯鄲張野撰

鶴盟詞鈔 國朝永年申涵煜撰

申隨叔樂府一卷 永年申涵盼撰

宋琬序曰李西涯少師創為樂府新聲詠前史所列行事流布當時膾炙人口惜其刻劃太盡無復清廟朱絃三歎遺音隨叔太史讀書尙友往往別有所見短章七十乃其破萬卷而為之者言遠而旨賅論嚴而語雋風雨晦明一乍讀之覺古人在行席間不獨音節之妙琅琅作金石聲也

耐俗軒新樂府一卷 永年申頌撰

右詞曲類

方志部

廣平府志十六卷

明郡守翁相修給諫長垣縣丞陳棐

案是書久佚無傳本舊志載有嘉靖庚戌巡撫商大節序已酉巡撫江右項廷吉序項廷吉序略云余巡至廣平翁郡守相以梓完郡志來觀實維陳棐氏往以給舍謫丞長垣時撰次有經緯二集有一圖三表十二紀經緯者兩儀之象也一圖者太極之體也三表者效三才也十二紀者法十二時也對待有相配之體禪繼有相生之序是故於志之前編而觀之觀疆域而志於保障之固觀郡縣而志於撫綏之周觀山川而志於奠安之永觀公宇而志於政惠之施觀學校而志於樂育之澤觀版籍而志於生養之庶觀壇宇而志於鬼神之治觀古蹟而志於保治之恒再於志之後編而觀之觀官秩而志於收理之道觀選舉而志於彙征之吉觀宦業而志於遺愛之存觀賢行而志於厚德之光觀列淑而志於敦睦之基觀恩澤而志於施報之渥觀紀歷而志於豫泰之久觀風俗而志於丕熙之懿凡此一皆仁愛之流行也

廣平府志二十卷

撰

國朝郡守沈奕琛修郡人申涵盼

是刻板已毀流傳甚鮮鷗盟齋孫生員申瑞澄采進志引二十則曲周拔貢王光簡家藏一部缺首册舊志載有尚書魏裔介冀如錫二序魏裔介序略云廣平名郡也天文上應昂畢辰星斗樞地勢北通燕涿南接衛鄭山則聰紫紅婁水則漳滏洛沙風氣迴環墳壤沃饒洵河朔間一都會哉乃舊志相沿一百三十年未經再修缺有間矣維太守石友沈公師帥敷化大雅在躬觀察進也潘公蘊籍宏深風標朗峻下車以來即欲蒐采成一家言垂光琬琰適有內閣衛公之條議撫軍金公之憲檄遂造隨叔申太史之廬而請焉曰非先生椽筆無以謀不朽太史亦遂降心以從曰余嘗珥筆金華殿中矣纂述之勞又烏可辭於冬迄於丙辰之春未百日而畢厥役其相與參酌則冀司空公治甯柱史元著王方伯襄璞書既成矣石友使君遣一介之使問敘於余余焚香誦之繼之以膏見其贍而有要詳而有體自星野沿革暨災祥雜志共二十卷而古今典制興革地方人物勝蹟天道地勢人事之本末備矣告竣雖以百日緡閱取之廿一史歷有三載此龍門扶風之遺意可為龔黃

元魯之指南也豈不盛哉

廣平府志二十四卷

國朝郡守吳穀修板存府禮房

自序云郡志創自明成化間郡守秦民悅嘉靖間蔣彬翁相重修翁時秉筆者為長垣謫丞陳給諫葉蔣奕琛屬郡人申太史涵盼續之乾隆乙丑知府烏程吳穀重修成書二十四卷前有學院呂熾巡道沈世楓及吳穀自序自序略云嘗謂史可數百年一修志不可數十年不再修也史有實錄起居注會典檔案班班具在志則見聞異辭故家家乘溢美失實金石刻文字散棄於山林墟莽之間其成憲頒布者胥吏上下其手甚或不戒於火則網羅釐定惟恐後時匪守土者責而誰責與  
世廟重光澄清渙汗視昔有加澤既不勝書  
今中人材之登進田畝之開闢祠壇之增設河渠堤堰之改築驛遞倉儲兵戎之裁制即如磁州向隸於豫今歸郡轄皆前志所未嘗有者爰偕同志繙閱鱗次

闕者補之合者分之無益者汰之釐二十門為二十八門非好異求多也七十年中之實蹟宣上德達下情胥於是乎在也

永年縣舊志四十四卷

國朝邑令孔廣棟修是志乾隆二十二年成書有傳本

永年縣新志四十卷

邑令夏詒鈺修板存縣署

新志凡例永年有志創自前明縣令宋祖乙孔志凡例則云始創於申太僕端愍公再修於朱固陵補葺於盧黃安嗣後侯君可大王君玲亦增刊乾隆二十二年知縣孔廣棟重修成書前有廣棟自序及劉叔枚序光緒三年知縣夏詒鈺增修四十卷

曲周縣志二十卷

國朝邑令存祿修板存縣署

新志序云縣志自明嘉靖辛卯知縣黃驊初修萬曆癸卯知縣高公重修國朝順治十三年知縣李時

茂續修乾隆十二年知縣勞宗發重修同治八年知縣存祿邑人劉自立編輯成書二十卷

肥鄉縣志三十六卷

國朝邑令王建中修有傳本板已毀

縣志序云縣志自明嘉靖十七年戊戌知縣鄒理修四十年辛酉知縣商誥繼修萬曆十八年庚寅知縣廉靖重修國朝康熙二年癸卯知縣焦祖續修四十九年庚寅知縣許國斌增修雍正十年壬子知縣王建中補輯

肥鄉縣新志三十六卷

教諭趙文濂撰是志同治六年刻成

雞澤縣志二十卷

國朝邑令王錦林修有傳本板已毀

縣志自明貢生康守愚邑令曹孔榮創修國朝順治四年知縣吳應文重修康熙十二年知縣姜紹續纂乾隆十九年知縣武進王光燮增修乾隆三十一年知縣蕭山王錦林續輯成書二十卷郡守單煥為序之

雞澤縣新志二十卷

邑令錢錫棠修是書光緒十八年教諭賀家駿編

輯有  
稟本

廣平縣志五卷

國朝邑令夏顯煜修有傳本

縣志自明萬曆己丑邑令陳鑿創修萬曆戊申邑令王一龍重修舊序尚存國朝康熙十五年知縣夏顯煜續修卷首有顯煜自序

邯鄲縣志六卷

國朝教諭王炯修有傳本

初序明萬曆元年癸酉邑孝廉張成教纂輯邑令張第成之既而邑令盧龍雲為之增補是日續編國朝順治三年丙戌邑令韓思敬重修康熙二十二年癸丑邑令張慎發增輯雍正八年庚戌邑令鄭方坤重輯乾隆二十年教諭王炯續修郡守劉叔枚為之序

邯鄲縣新志五册

邑令英榮修杜受全刪定稟本略具未付梓

成安縣志十二卷

國朝邑令孫培曾修  
板存縣署

縣志自明萬曆二十七年虞延劉永脈修後十年學  
博雍邱王孫昌增補 國朝康熙十二年知縣王公  
楷重修嘉慶七年知縣孫培曾續  
輯顏日曾自序及教諭宋鳳翼序

威縣志十六卷

國朝邑令李之棟修  
有傳本

縣志自明知縣錢亦創修胡容田可并繼修萬曆庚  
申知縣張蒙正重修 國朝順治丙戌知縣袁天秩  
又益續志一册前後未會合映康熙癸  
丑知縣東萊李之棟取二册彙輯成書

清河縣志四卷

國朝邑令黃汝香修  
板存縣署

縣志自明嘉靖三十年邑令孟仲遴修萬曆年知縣  
向日紅夏琮補 國朝康熙丁巳知縣盧士傑重  
輯康熙戊戌知縣會稽錢啟文重修前有啟文自序  
及舊序同治十一年知縣王鏞續補光緒九年知縣  
黃汝香  
刪定

磁州志四卷

明劉溫撰  
明史藝文志

磁州志十八卷

國朝州牧蔣擢修  
板存州署

州志自明成化己亥張夢輔修正德戊寅張珂繼修  
後自嘉靖癸丑至萬曆庚辰有周文龍孫鑑栗永爵  
羅湖趙範相繼重修 國朝順治戊戌州守張瑞午  
重輯康熙二十四年乙丑知州皖江任塾釐訂舊志  
為十二卷康熙三十九年知州蔣擢重訂成書十八  
卷卷首有州人張榕端序蔣擢序及舊志序同治十  
三年知州程光瑩  
續輯六卷附後

Blank area with faint vertical lines, likely a placeholder for a rubbing or a large inscription.

重修廣平府志卷三十五

金石略上 古有今存

趙羣臣上疇石刻 篆書在永年縣西六十里豬山上  
摩崖篆刻趙廿二年八月丙寅羣臣上疇此石北十五  
字

永年縣西六十里婁山一名狗山上有石刻隸字一行  
云趙廿二年八月丙寅羣臣上疇此石北以晉書考之  
知爲石虎時所刻案晉載記石勒以太興二年稱趙王  
元年始建社稷立宗廟後廿二年爲石虎之建武六年  
當晉成帝之咸康六年虎伐燕不克而還謁石勒墓朝  
羣臣於襄國建德前殿至鄴設飲至之禮由襄國至鄴  
廣平爲必經之道君臣會飲當在此時說文西部醕主  
人進客也不宜施之於君上此醕當卽上壽醕壽皆從  
冑聲古字得相通假元和郡縣志臨洛縣狗山武德二  
年太宗親討劉黑闥於此立營廣平府志此山有唐太



宗碑蹟余求之不可得轉獲石趙時刻

石乞漿得酒亦自快意交翠軒筆記

沈韻初孝廉樹鏞以趙廿二年石刻見示此石在直隸

永年縣西六十里婁山其文曰趙廿二年八月丙寅羣

臣上醜此石北沈西雍觀察謂是石虎建武六年所刻

上湖石勒之年而兼數之故稱廿二年然金石刻辭從

無此例劉寬夫侍御謂漢侯國得自記年定為趙王遂

之廿二年較沈說為得之然考前漢書趙敬肅王彭祖

共王充並享國長久後漢書趙節王栩項王高惠王乾

亦享國長久此五王皆得有二十二年侍御必據魯三

十四年石刻謂彼刻稱五鳳二年魯卅四年而此不冠

以漢年明是漢文帝時未有年號之故遂決以為趙王

遂此說亦未足據侯國自記年原不必定冠以王朝之

年魯卅四年石刻亦未可泥為定例使必冠以漢年則

文帝雖無年號獨不可冠以漢幾年乎然則

此碑為何王固不能臆決矣春在堂隨筆

趙上壽刻石摩崖刻趙廿二年八月丙寅羣臣上醜此

石北篆書後有判官郁久闓明達題名廣平府西臨洛

關猪山巖

輔碑目

羣臣上壽刻石篆書趙廿二年丙寅大興劉位坦考為

西漢文帝後元六年左側有口口判官郁久闓明達題

名乃北魏人書之謙案此漢彭祖刻疑

為石趙非直隸永年續寰宇訪碑錄

漢婁山石刻篆文十五字題曰趙廿二年八月丙寅羣

臣上醜此石北石刻在直隸廣平府永年縣西臨洛鎮

左近婁山一名狗山考漢書地理志趙國易陽縣嘉定

錢獻之謂今廣平臨洛鎮為漢趙國易陽縣治曩讀班志易

陽縣注引應劭曰易水出涿郡故安師古曰在易水之

陽案漢故安在今直隸易州為申屠嘉封邑趙國疆域

不能至是易水經流亦不應南至趙國心竊疑之嗣閱

太平御覽卷六十四地部漳水條引風土記曰南易水

本名漳水源出三門山案趙地志云六國時此水名易

水埤蒼及水經云洛水其目不知何時改俗謂山之下

地名洛水因經之故曰洛水案燕趙記曰其分有三易

而此石刻在其山椒蓋漢時此山在易陽境內地屬趙國故其國王與其羣臣登山壽其云趙廿二年者考漢陽泉使者含薰鑪款題六安十三年錢氏侗謂六安乃漢時國王封地以紀其歷年與五鳳甄稱魯卅四年之例正同則此云趙廿二年亦即其例也但不知為何王之紀年考漢時王趙者高帝時則有張耳考惠高后時則有隱王如意共王恢幽王友均享國日淺不及廿二年惟趙王遂以孝文元年紹封二十六年孝景三年反誅繼之者為趙敬肅王彭祖於孝景四年徙趙六十二年薨厥後如頃王昌懷王尊哀王高又皆不及廿二年惟共王充以元康元年嗣五十六年薨同時復有平干繆王元以元鳳元年嗣二十四年五鳳二年坐殺謁者會薨不得代亦稱趙王然繆王之廿二年為宣帝神爵四年正趙共王充正位之八年彼其羣臣上壽不當復以趙紀年則此趙廿二年決非繆王元也且石刻云趙廿二年必據其立國之始以紀年考共王充之廿二年當元帝初元五年趙之立國已百有餘年不當云趙廿二年知亦非共王充也然則其為趙王遂乎細考漢表趙王遂以孝文元年紹封則其廿二年正孝文之後六年是年匈奴三萬騎入上郡三萬騎入雲中夏四月

復大旱蝗漢廷君臣方切憂勞而藩國羣臣反宴然上壽刻石貢諛無此理也厥後趙王遂雖不終臣節而當孝文之世猶未有鼂錯削地之議似不應狂悖乃爾况趙王遂以幽王子紹封亦非始封之君不得云趙廿二年則亦非趙王遂也蓋則此所稱趙廿二年要唯趙敬肅王之紀年庶幾近之蓋王以孝景四年徙封其廿二年為武帝元光四年彼時海內宴安朝廷無事故與羣臣上壽此山合之本傳常夜從走卒行微邯鄲中及諸侯過客以彭祖險頗莫敢留邯鄲故其羣臣亦竟侈然上壽勒石以為觀美是此石刻當為漢武帝時物其可疑者宋之歐趙洪諸家於金石之學搜羅殆徧即國朝顧朱錢王以及乾嘉之翁孫考證精博而於此刻曾不一及况此刻又係摩崖非同墓誌諸石納在壙中須待出土始見臨洛婁山亦非僻地兩唐書地理志及元和郡縣志均言太宗征劉黑闥嘗登此山刻石既登此山豈不見此刻而唐人亦無言及之者何直遲至今日而人始見之耶茲因近日考據家紛紛辨證姑為之推闡時地論說於左而仍不能無疑也求是齋藏碑目

案交翠軒筆記謂此刻為隸字誤又謂此乃石趙時

刻春在堂隨筆已駁之矣石虎本無此年數伐燕之年爲建德六年是年八月亦無丙寅日也大興劉侍御位坦定爲漢趙王遂之廿二年謂漢侯國得自記年據魯三十四年石刻爲證然彼刻上稱五鳳二年此刻雖是漢文帝時未立年號而獨不可冠以漢幾年乎侯國之尊王朝豈以有無年號而異况羣臣上壽語氣侈大侯國僭妄亦不至如此求是齋碑目定爲趙王彭祖亦屬臆斷又謂宋朝歐趙洪諸家暨國朝顧朱錢王以及乾嘉之翁孫搜羅考證皆未及此不能無疑非也漢封龍山碑至道光年間始見於世

豈能因歐趙諸公未曾著錄而見疑乎貴筑黃氏彭年云此戰國趙武靈王時所刻其時北伐中山燕代拓地千里胡服自尊君臣行慶會飲於此山上理固然也左側有唐宋題名金石索所引亦同此議縣志云字小篆體似非秦以前刻然細審是刻趙上年等字均係大篆結體渾樸蒼勁非漢晉以後所能及安知李斯篆法不有所本乎或云唐太宗在此立營何以不言此刻不知太宗立營在狗山此刻在豬山非一處也漢刻既有所疑石趙決無此刻故仍列之於趙以俟考

漢

瀉于長夏承碑 八分書碑高八尺一寸廣三尺九寸

十三行行三十字後刻唐曜記四行正書石在永年縣

署東紫山書院

篆額三行黑字 漢北海瀉于長夏君碑 文十四行行二十七字第

十一行銘文另起嘉慶中翁方綱依無錫華氏本重摹

知府石飛熊分勒六石今嵌府署東客廳西廊下 翁跋云是

碑宋元祐中洺州因治河出土故其石在今廣平府歲久碑仆明成化己亥前守秦民悅建愛古軒覆之後為築城工匠所毀嘉靖乙巳前守唐曜重刻於講院成化本因下半泐蝕字多失真而嘉靖本因之舛訛滋甚今以無錫華氏真賞齋舊藏古本北平翁方綱重摹始還舊觀知廣平府宿松石飛熊知永年縣代州郎錦麟同

校選工重勒嘉慶十年乙丑春二月朔記

右漢瀉于長夏承碑云君諱承字仲充東萊府君之孫

太尉掾之中子右中郎將弟也累葉牧守印綬典據十

有餘人皆德任其位名豐其爵是故寵祿傳於歷世策

薰著於王室君鍾其美受性淵懿含和履仁治詩尚書

兼覽羣藝靡不尋暢州郡更請屈己匡君為主簿督郵

五官掾功曹上計掾守令冀州從事又云察孝不行太

傅胡公歆其德美旌招俯就羔羊在公四府歸高除瀉

于長又云年五十六建甯三年六月癸巳淹疾卒官

碑在今洺州元祐間因治河隄得於土壤中建甯靈帝

時年號也距今千歲矣而刻畫完好如新余家所藏漢

碑二百餘卷獨此金石錄

右漢北海瀉于長夏承碑篆額此碑字體頗奇怪唐人

蓋所祖述漢字有八分有隸其學中絕不可分別梁庾

元威作書論載隸十餘種曰芝英隸花草隸幡信隸鍾

鼎隸龍虎隸鳳魚隸麒麟隸仙人隸科斗隸雲隸蟲隸

龜隸鸞隸此碑蓋其間之一體郭仲奇碑云有山甫之

縱又云微縱顯魯峻碑云比縱豹產趙圍合碑云羨其

金石路上

縱高外黃碑云莫與比縱此碑云紹縱先軌皆以縱為  
蹤字讀者乃以為蹤蹟之蹤非也據此數碑則漢人固  
多借用顏氏之注殆未然也碑以薰為動淹為奄咳為  
孩感為戚黨為儻蒂即策字退即退字戀即轡字隸

釋建甯三年立在洺州州衙金石錄云元祐間因治河隄

得之刻畫完好如新隸釋云隸體奇怪漢隸字原

蔡邕書夏承碑如夏金鑄鼎形模怪譎雖蛇神牛鬼龐

雜百出而衣冠禮樂已胚胎乎其中所謂氣陵百代

筆陣堂堂者乎碑在今廣平府學王惲秋澗集

予承乏廣平見府治後堂有碑仆地閱之乃漢北海涪

于長夏承碑建甯三年蔡邕伯喈所書八分體案古者

天子諸侯士葬必斲木樹豐碑鑿孔貫繩繹以懸棺而

下擴秦漢以下始易石臣子因書君父之功于其上今

碑額有孔政古制也但碑之下截凡一百一十字年

久蘇蝕係後人模刻覽者當自擇之明舊府志

右蔡邕書涪于長夏承碑在廣平府承不知何許人其

仕與卒皆無當於廣平碑所自來莫可考竟承樂七年

修歲久踏仆成化己亥前守秦公民悅復建愛古軒以

覆之碑首有穿疑所以受絳懸棺而八分字畫奇古信

為漢物無疑迨今幾七十年海內賞鑿口口口矣嘉靖

癸卯築城之後為工匠所毀越二年口來守郡索諸瓦

礫間不獲乃取模本臨石置亭中予觀歐陽子集古錄

至千卷自口為多口碑錄所未載口其時已云漢隸難

得况後此五百年復見古人未及見之完碑乃不幸而

淪毀豈不可深惜耶今臨刻道勁不失漢風骨足作佳

觀宅時興修者他山之石何限豈口茲口也

哉嘉靖乙巳五月唐曜重刻夏承碑記

碑後刻尚書蔡邕伯喈及永樂七年等字乃庸妄人所

加楊文貞公集中亦有此跋謂近歲廣平府民因治河

得此蓋廣平古洛地也所謂近歲恐即承樂七年予向

官京師時廣平府通判山西宋孟清為予言府學復有

一碑字與此類予益疑焉江陰徐子擴好奇士也嘗得

舊刻雙鉤其字近以惠予與此絕異此云勤紹舊刻作

勤約且其間字之闕者四十有五而此獨完好則其偽

不俟乎言楊公跋又謂中書舍人陳登以碑為蔡伯喈

書蓋不考王氏文集之故後公撰登墓志言承樂間以

篆書名者登之外有吳中滕用亨四明王尹實觀此亦

可以知其師矣

金薤琳瑯

碑稱夏君於建甯三年六月卒官而是時伯喈齟橋司徒府出長河平入為郎中又其隸法時時有篆籀筆與鍾梁諸公小異而骨氣洞達精彩飛動疑非中郎不能也但蔡集不載而他書亦無可考姑闕以俟知者 弁

州山人

臨汝帖以為蔡邕書後遂仍襲弗疑今重刻者直書於碑末云建甯三年蔡邕伯喈書中郎之蹟傳於今者惟

石經遺字為有據而與此碑

字體不類不足信也 隸辨

夏承碑余据趙氏金石錄洪氏隸釋婁氏漢隸字源及廣平志唐曜重刻碑後記斷為自元祐間至嘉靖乙巳

四百餘年只原刻一碑重刻一碑兩石耳而兩石安置之處只一廣平府治耳至於碑在府學之說乃見於元

王暉秋澗集案此碑出上於元祐復樹於成化前後並在府治秋澗介乎其間乃云在府學此必其集偶譌一

學字耳明正德間都穆著金薤琳瑯而秦民悅之復樹在其前不及四十年唐曜之重刻在其後不及三十年亦前後並在府治都穆介乎其間乃因秋澗集府學二字之云而問於曾任廣平之通判宜其順口答以府學

有之實則莫須有之言耳又案此碑初出土時完好如新久之剝落四十五字又久之剝刻下截百有一十字

又久之并將勤約刻譌為勤紹此原石前後搨本不同之故其本皆四十行行二十七字唐曜重刻則取原碑

已為勤紹之搨本勒石全文不闕而改為十三行行三十

十字此兩石之可考者耳後人未至其地未經目驗又

不詳考諸家著錄徒以府學二字之譌遂有府學一碑

與譌勤紹者字相類之說又有初翻本亦作勤約之說

是原石未毀之前已先有兩覆本加以唐曜重刻共有

四石宜其聚訟無所折衷也夫府學非僻地也秦唐兩

郡守後先圖存漢碑又大彰明較著者也乃不知府治

之外復有一碑志廣平者境內金石皆將求索無遺而

近在府學有漢碑廣石獨逸之此皆未為近理必不然

矣此本的真原石舊搨下截初刻約字未譌者都穆所

得雙鉤本當不至懸隔余限以每行二十七字驗之皆

有接縫其所謂闕四十五字在下截者猶可數其殘損

字數原石修於永樂七年即定是本為其時所搨雖不

中不遠矣抑余於是碑更有說焉昔人謂此碑為蔡中

諸碑字之冠中郎書超絕一代凌轢千古其九勢云惟筆軟則奇怪生焉然則中郎所謂佳書者在奇怪也論者不明書道輒以此書奇怪而欲降格位置之亦異乎吾所聞也 通藝錄

案是碑元拓或云舊藏府城李氏家及索觀之仍唐曜重摹之本或又云南門外額題陽明門三字之石即夏承碑原物也案秦跋是碑額上有孔洞穿今南門額石未有穿孔之迹恐未必是

晉

右將軍王羲之書重修廣平府學記 明穎川趙澄集字大學士何如寵撰文長洲邵瑩摹勒并鐫凡八方共一碑前四方記文銜名每方三十二行後四方題跋七

則篆隸行草各備碑在府學戟門右

推官余忠宸識云程公修學方新忠宸始參郡幕又數月落成祭吉郡多士問道其中謬委司李主焉尋程公以艱奪廩餼故在予督筆硯罔敢懈且於舍南更構數百椽居焚修者廣公志也多士素佩公色笑而又有修學之績不可諉走求相國何公言聘穎川趙生澄長洲邵生瑩搆故劉大司徒家宋搦右軍諸本集之上石

東魏

太尉高翻碑 舊在磁州南八里大道旁後斷為兩截下截剝蝕模糊十失八九上截三十行字畫端正筆力遒勁六朝書猶有漢隸遺意額四行題魏侍中黃鉞太尉錄尚書事孝宣高公碑十六字陽文完好惟書字剝蝕光緒二十年合肥相國李公札飭磁州裴牧搜訪移

立於州學明倫堂

右東魏高翻碑翻齊獻武王歡叔父也魏書本傳云以元象中追加贈諡碑後題建立歲月文字殘缺惟有魏元字可辨又云歲次己未案東魏孝靖以元象二年十一月改元興和是年歲次己未此碑蓋元象二年建立也

石錄 碑在州城南門外五里村民家元象二年立碑 題北齊臨清王假黃鉞高公碑 寶刻叢編

案魏書翻附高湖傳湖長子樹生即齊獻武王歡之父樹生弟翻字飛雀以器度知名卒於侍御中散元象中贈假黃鉞使持節侍中都督冀定洛瀛并肆燕恒雲朔十州諸軍事大將軍太傅太尉公錄尚書事冀州刺史諡曰孝宣北史齊清河王岳傳畧載岳父

翻官爵無追贈臨清王事此碑第二十一行有清河郡開國公字寶刻叢編所載臨清當為清河之誤金石錄云此碑為歲次己未立今未行漫漶已難辨識此碑當係東魏刻石翻仕魏朝實未封王既不得稱臨清王更不應有北齊國號若係北齊刻石齊無己未紀年又當題為大齊不應稱曰北齊寶刻叢編所載題額一條紕繆太甚且與元象二年語自相矛盾今碑首題銜並無北齊字亦無臨清王字京畿孫星衍金石考樊彬畿輔碑目翻皆誤書作翻寶刻叢編云在州城南門外五里亦誤



北齊

蘭陵忠武王肅碑

隸書碑陽字可辨者十八行後數

行模糊尤甚下截大半漫漶碑陰隸書字小約畧可數者三十行文可識者三百餘字陽面額四行題齊故假

黃鉞太師太尉公蘭陵忠武王碑十六字碑陰額題有

文襄第五子太尉公安德王經墓興感詩一首五言五韻文入

陵墓今在磁州西南劉家莊

案北齊書北史蘭陵武王長恭一名孝瓘芒山之捷

戰勲最著歷司州牧青瀛二州累遷并州刺史為太

尉以戰功封鉅鹿等郡公皆與碑合惟孝瓘之名碑

未載碑文首言王諱肅字長恭云碑中可識者有乾

明元年除左右大將軍封徐州蘭陵郡王碑陰云轉

錄尚書事三登禮閣皆與史異蓋史闕也忠字之諡

史亦遺漏史祇言贈太尉隸體端渾雄健漢法猶存無撰書

姓氏

又案安德王延宗傳延宗聞蘭陵死哭之曰何故殺

我兄今觀其經墓詩有墮淚傷情語蓋亦篤於友愛

者矣

唐邕寫經碑

八分書武平三年五月二十八日在磁

州西四十里鼓山洞內

金石分域編

案唐邕北齊書北史皆有傳字道和太原晉陽人天統間除侍中并州大中正復出為趙州刺史武平初坐事除名此碑立於武平三年當是罷職時所刻北朝造經造象多祈請之詞此寫經當亦此意也

石刻維摩詰經 八分書凡六石無年月在磁州響堂寺

案金石分域編唐邕寫經碑載所寫之經有維摩詰經一部即此今拓本無此經聞在石洞上層字多剝蝕也

石刻無量義經 正書大字凡二石無年月在磁州鼓

山金石分域編

大方廣佛華嚴經普門品 八分書摩崖凡六石刻在

鼓山響堂寺

案續寰宇訪碑錄與後大字佛經皆以為隋開皇年刻而並無確據北齊既有唐邕寫經此碑當亦同時所造仁和龔橙言山西風峪有石刻佛經數種係北齊時人題款與此如出一手此經品凡六石尚完好無泐字徑寸瘦勁類太公呂望表而整齊過之隋朝刻石無其侈也通志作法華經誤金石分域編作三石亦誤

妙法蓮華經 八分書摩崖刻凡六石無年月

案此經亦在響堂寺字徑二寸許結構與華嚴經同筆法波磔已開唐隸先聲

石刻文殊般若經品 八分書摩崖無年月 金石分域編

案此亦在響堂寺字徑四五寸首文殊師利字蓋卽般若經中之一品也凡十行高尋許寬半之其字結體渾樸絕無北朝桀驁氣勢有魏一代石刻皆雄健生峭如刀斫斧鑿至東魏則漸求姿致此刻全以楷法作隸間參以篆意北朝碑中不易多得之品

石刻般若經品 八分書摩崖無年月 金石分域編

案此與前刻在一處字大小結體咸同凡二十行惟前刻修而狹此則短而寬蓋就崖石之勢爲之首善男子善女人等字亦般若經中之一品也

昭元沙門統定禪師造佛象題字 分書在響堂寺摩崖大字無年月敬造六十佛五字在師字下雙行刻

案金石分域編畿輔碑目均作定禪師無上五字今據石拓增之但佛號確是十六此刻六十殆指十六佛旁之小佛像言也

佛號十六尊 在響堂寺洞內正書行倒排第一阿闍佛第二須彌頂佛第三師子音佛第四師子相佛第五

虛空佛第六常滅佛第七常相佛第八梵相佛第九阿彌陀佛第十度一切世間佛第十一多摩跋梅檀香神通佛第十二須彌相佛第十三雲自在佛第十四雲自在王佛第十五壞一切世間怖畏佛第十六我釋迦牟尼佛

案此刻字大小不一有並列者有接刻者大者徑三四寸小者徑寸餘蓋就石佛像側空石鑄之故不能一律

殘石刻經品 分書在響堂寺摩崖下半已泐僅存上半每行三四字皆徑二寸餘以上四種字體髣髴殆皆

一手所書

殘石刻金剛經 在磁州響堂寺八分書摩崖無年月

金石分域編

韓浪苟等造象記

正書無年月

金石分域編

蕩寇將軍盧遵等造象記 在磁州響堂寺

畿輔碑目

案此二記本是一記今考此記題名凡二層上層第一行都維那韓浪苟苟字已泐第二行維那李元吉第三行邑忠正盪寇將軍盧遵分域編及碑目蓋各據所見而書也查後數行有官銜者尙不止此第四行邑忠正馬席五行珍遠將軍田景賓第七行厲

威將軍張迴軍忠當中字之訛珍為鎮字之別也

李華暉造觀世音象記 八分書三行字大三寸首行

觀世音象四字次行信女二字約畧可見三行李華暉

三字李字已剝蝕在磁州響堂寺石窟

爰公主造觀世音象記 正書凡三行首行僅一世字

可見次行王清信女四字二行爰公主三字在磁州響

堂寺石窟

案通志公主誤作公玉蓋未見原拓也

馮子昌造阿彌陀佛像記 正書阿彌陀像王馮子昌

供養十字一行供字已泐在磁州響堂寺石窟

案以上三種仍依通志附列北齊

隋

順陽郡守安樹造阿彌陀佛像記 正書兼八分書凡

九行在磁州響堂寺

翊軍將軍順陽郡守□□造象八分書  
開皇四年九月二十一日 金石分域編

安□□造象記正書開皇四年 畿輔碑目  
隋志無順陽郡北魏順陽郡二一屬荊州即隋順陽縣

在今河南浙川廳東南一屬廣州在  
河南郊縣東南 求是齋藏碑目

案隋書地理志南陽郡順陽縣在魏為荊州順陽郡

久廢隋為襄城郡郟城縣在東魏為廣州順陽郡至

開皇二年郡始廢又案隋翊軍將軍與下郡太守同

品見隋書百官志荊州順陽郡廢已久廣州順陽至開皇三年始罷此碑適立於開皇四年則安樹所守之順陽乃魏廣州之順陽郡也記內安字已泐樹略具字形樹下確是為字上半字可辨非人名也下緊接亡妻敬造云云下又云觀世音二菩薩是不止一阿彌陀佛也

袁子才造釋迦像記

正書開皇八年四月八日

金石分域

編

文凡八行為亡父母敬造在磁州響堂寺

案此刻字勢皆有波磔頗類分書北朝人好以隸體作楷石刻中往往見之文中仰作仰像作像所作

聖作醒妻作婁皆別體惟託容淨域容字不可識曾見正定隋龍藏寺碑陰列諸縣之名靈壽作零壽知當時零靈通用此刻託靈淨域句法亦貫蓋借零代靈而又訛書作容也

王輝兒造阿彌陀像記

正書凡九行開皇八年口月

口亥朔二十一日己酉敬造在磁州響堂寺

案金石分域編作八分書續寰宇訪碑錄謂在麴山均非

佛弟子口口口造阿彌陀像記

正書兼分書文凡十

行人名剝蝕開皇十二年歲次口子四月丙子朔口口

日癸未為亡考敬造在響堂寺

案續寰宇訪碑錄作分書今考石刻實正書微有波磔也

烏容女造像記 八分書開皇十三年在磁州響堂寺

畿輔碑目今字多剝蝕

重修滏山響堂寺 八分書開皇十七年金石分域編今字

多剝蝕約計正面二十行第十行有河東桑泉人也開皇十三年十口月剖符此縣字第十四行又有開皇十口口字在響堂寺洞門內

案隋書地理志桑泉縣屬河東郡今蒲州府臨晉縣

治是修寺之人本籍桑泉來宰滏陽也第十行開皇年月是莅任之年第十四行開皇云云是修建之年

書法堅挺有分書之意實非分書也

李君謦造像記 正書大業七年正月二十四日金石分域編

今字多剝蝕在響堂寺

衛大將軍杜霍造像題名 邑老衛大將軍杜霍等造

象題名八分書無年月金石分域編在磁州響堂寺

畿輔通志隋制有左右衛左右武衛等大將軍皆正三品見隋百官志而獨無衛大將軍名目杜霍隋書無傳此稱邑老當為磁州人唐宰相表無磁州杜氏亦無霍之名

案此造像題名凡三層上層十六行中層十七行下

層十三行上層首行寺邑主鄴縣功曹云云曹字以下全泐第三行杜震第五行有幽州總管參軍杜伯奇第十一行有蕩寇將軍張毗沙三層之外末二行有輔國將軍梁州濟陽令邑老牛進考地理韻編隋濟陽縣屬豫州此題曰梁州濟陽則為北魏縣矣牛進於隋稱邑老或元魏未曾仕梁州亦未敢定又有驃騎大將軍前口雍州鎮城邑老馬元和二人考隋書百官志州置總管為上中下三等參軍從八品又置謁者員十二衛各置大將軍一人輔國與冠軍同品蕩寇與蕩難同號皆是隋制通志言無衛大將軍名目蓋未詳審也

邢州沙河縣范六題名 正書凡二行首行四字次行三字在磁州鼓山

案金石分域編作八分書今考石拓非也邢州襄國郡開皇十六年以魏司州之北廣平殷州之南趙兩郡合置治襄國縣開皇九年改名龍岡十六年又析龍岡置沙河見隋唐等書地理志

唐

洪湛造像記 分書貞觀五年在磁州響堂寺畿輔碑目

會福寺王口嵐造像記 正書兼八分顯慶四年七月

十五日金石分域編在磁州鼓山



案此刻首列相州滏陽縣滏陽宇文周所置隋於此  
置慈州後廢唐武德元年復置磁州滏陽卽州所治  
貞觀元年廢磁州改屬相州至代宗朝始復置此刻  
於高宗朝其時磁州已廢滏陽正屬相州也又案顯  
慶四年碑目作五年誤

郎餘令造像題名 正書顯慶五年金石分在磁州鼓

山

案郎餘令定州新樂人隋郎穎之孫官著作佐郎唐  
書儒林有傳

蔣王內人安太清等造像記 正書龍朔二年七月十

五日金石分在響堂寺

蔣王內人劉媚兒等造像記 正書龍朔二年七月金石

分城在響堂寺

案樊彬碑目作薛王內人云云考唐書宗室列傳蔣  
王名暉太宗第八子初封郟王徙王蔣永徽三年拜  
梁州都督上元中爲箕州刺史張君徹誣告自殺此  
造像題稱蔣王卽暉也高祖太宗諸子無封薛王者  
惟睿宗第五子惠宣太子業始封薛在景雲以後此  
刻於龍朔二年相去幾及五十載碑目作薛王誤也  
內人乃王府宮人女史之稱唐百官志親王國官有

學官長丞各一人掌教授內人者卽此

邙道女造菩薩像記

正書證聖元年九月十日

金石分域

編凡五行次行列比邙尼佛弟子邙道女等字在響堂

寺

案樊彬碑目作聖歷誤通志作邙道安亦屬懸揣

高禮澄妻口娘造像記

正書凡四行證聖元年十回

乙卯朔廿二回在響堂寺

田神鑒妻崔造彌勒像記

正書證聖元年九月十日

金石分域編

凡三行田字上有滏陽縣三字滏字已泐在響

堂寺

案樊彬碑目作聖歷誤作田神鑒造像亦脫字

比邙尼二娘造阿彌菩薩像記

正書證聖元年九月

十日

金石分域編

凡三行爲亡父敬造在響堂寺

案樊彬碑目誤作聖歷此刻有歲次乙未字考紀元

編乙未確是證聖元年也

田口口造像記

正書聖歷元年在磁州響堂寺

續寰宇訪

碑錄同

案通志此刻分域編失錄樊趙兩書皆列在尼二娘

造像之前亦作聖歷元年聖歷仍證聖之訛也茲附

載前三刻之後

口口道等造像記 正書萬歲通天元年十月二十八

日金石分在響堂寺

元收妻趙氏等造像記 正書萬歲通天元年在響堂

寺畿輔

案此刻題名處多殘泐碑目蓋照錄其見存之字標  
題也

令狐勝造像記 正書聖歷元年口月二十八日金石

編在響堂寺

王宏安妻吳氏造像記 正書聖歷二年金石分在響

堂寺

案續寰宇訪碑錄作宏安造像有脫字

高冲子造像記 正書聖歷二年九月二十日金石分

凡六行末行共同此福四字清晰在響堂寺

案此刻高冲子三字已漫漶略具字形而已

王大貞及妻高造彌勒像記 正書聖歷二年九月二

十日金石分凡八行王字上有鼓山鄉民四字在響堂

寺

案樊彬碑目及續訪碑錄皆作王大貞造像脫妻高

二字通志亦脫及字

董智力造彌勒像記 正書聖歷二年金石分凡八行

題名乃相州滏陽縣弟子董智力母陽為亡兄智儼敬造在磁州響堂寺

案通志云分域編續訪碑錄皆作董智力造像有脫字今考石刻其兄名智儼智力當是像主之名母陽當是母姓也

趙口口女三娘造像記 正書凡三行大足元年二月廿四日在響堂寺

案金石分域編有趙守訥妻口造像樊彬碑目及續訪碑錄皆有趙守訥造像歲月相符當即此刻今攷此拓守訥二字磨滅女三娘字顯然可辨與各著錄

家稍異

趙思錫造阿彌陀像記 行書與董智力造像合一石大足元年四月甲辰朔四日金石分域編凡九行弟子趙思錫為父母敬造像并二菩薩母字薩字已泐

案樊彬畿輔碑目作長安四年誤

趙思獻造像記 正書大足元年在磁州響堂寺續寰宇訪碑錄

郭尚口造像記 正書大足元年金石分域編在響堂寺

案今石刻尚字已不可辨惟大足字尚顯元年亦磨滅矣下有廿日觀音等字可見

口海造像記 正書大足元年在磁州鼓山續寰宇訪碑錄同

前成均口口口造像記 正書長安三年八月二十

日金石分域編在響堂寺

案樊彬碑目作二年誤

涇陽縣口口口造像記 正書長安二年在磁州響堂

寺畿輔碑目同

案唐涇陽縣隸關內道京兆府見唐書地理志

殘造像記 正書長安二年直隸磁州續寰宇訪碑錄凡十二

行下半多剝蝕在響堂寺

案此刻二年字已泐惟有歲次壬寅字可辨故知是

二年也

元恭母造阿彌陀像記 正書長安二年二月金石分域編

凡五行在響堂寺

案金石分域編脫母字通志母字下加空格亦非

郭方固造像記 正書長安二年在磁州響堂寺續寰宇訪碑錄

同

口口殘造像記 正書長安二年磁州鼓山石洞畿輔碑目

同

李子惠造像記 正書長安四年在磁州鼓山石洞畿輔碑目同

同

趙祖福造像記 行書十行神龍元年歲次乙巳三月  
庚辰廿七日在響堂寺

案續寰宇訪碑錄作正書非也細審祖福之祖似植  
字神龍年號已漫漶

李義節造阿陀勒佛像記 正書神龍元年八月在磁  
州響堂寺凡六行爲亡男德潤敬造

金石分  
域編同

內玉師道造像記 正書神龍元年在磁州響堂寺

續寰

宇訪碑  
錄同

弟子口口殘造像記 正書神龍元年在磁州響堂寺

案續寰宇訪碑錄暨通志皆作弟子妻燕氏造像記

今以石刻考之文凡三行首行弟子下全泐次行首  
有燕鳥身登口厄等字並無氏字亦無妻字

弟子口口戒娘造地藏像記 正書神龍元年在磁州鼓

山石洞

續寰宇訪  
碑錄同

弟子口口妻口造像記 正書神龍元年磁州響堂寺

畿輔碑目續  
寰宇訪碑錄同

李敬叔造像記 正書神龍元年直隸磁州鼓山石洞

續寰宇訪  
碑錄同

蕭口口爲男和晦造像記 正書神龍元年磁州響堂

寺

畿輔  
碑目同

案續寰宇訪碑錄作神龍二年誤

思敬忠造像記 正書神龍元年磁州響堂寺 碑目同 畿輔

案續寰宇訪碑錄作二年

武思立妻王造阿彌陀像記 正書凡九行神龍二年

五月十五日在響堂寺

佛弟子口處貞造地藏菩薩觀世音像記 正書景龍

二年三月在磁州鼓山石洞 金石分域編 畿輔碑目俱同

佛弟子口大娘造觀世音像記 正書景龍二年三月

二日 金石分域編 凡四行龍字月字均泐在磁州響堂寺

比邱尼翟修意造像記 正書景龍二年三月二十三

日 金石分域編 在響堂寺

僧忠造阿彌像記 正書凡六行景龍二年四月八日

敬造

案通志及樊彬碑目皆作僧忠口造像今考此刻僧字已泐忠字下即接敬造字無剝蝕也觀其文上為皇帝下為蒼生不及其私是僧家語氣故仍其舊

吳口口造地藏菩薩觀世音像記 正書景龍四年二

月十日 金石分域編 凡五行零一字在響堂寺

案畿輔碑目作二年誤考唐書溫王重茂於景龍四年六月改元唐隆此以二月造故猶稱曰景龍四年

弟子下吳字已泐其半下二字約畧似四娘字

薛口口造像記 正書唐隆元年在磁州響堂寺

同目 輔碑 畿

案中宗以景龍四年崩温王重茂卽位於是年六月  
改元唐隆七月睿宗復辟再改元景雲以時計之唐  
隆紀年不及一月此造像月分漫漶當是元年六月  
所造

但大娘造像記 正書景雲二年在磁州響堂寺

續寰宇訪 碑錄

吳四妹造像記 正書景雲二年在磁州響堂寺

續寰宇訪 碑錄

碑錄 同

弟子口口法造像記 正書太極元年在磁州響堂寺

續寰宇訪 碑錄同

案是年五月改元延和八月睿宗內禪復改先天此  
石月分漫漶當是五月以前造

佛弟子口口造像記 正書先天元年在磁州響堂寺

畿輔碑目續 寰宇訪碑錄同

案先天元年卽太極元年元宗卽位於八月改延和  
爲先天此刻月分磨泐當在八月以後

殘造像記 正書六行先天口口在磁州響堂寺

輔碑 畿



同目

造觀音像記 正書開元元年在磁州響堂寺畿輔碑目同

殘造像記 正書開元四年在磁州鼓山石洞續寰宇訪碑錄

同

郭方山造像記 正書開元五年正月二十三日金石分域

編凡六行為合家疾病敬造在磁州響堂寺

李希誕等造像記題名 正書開元五年二月金石分域編

在磁州響堂寺

大實際寺僧承慶等造像記題名 正書開元五年二

月十三日金石分域編在磁州響堂寺石經後

薛宏道造像記 正書開元五年在磁州響堂寺續寰宇訪碑錄

同

河南府大開國口口造像記 正書開元五年在磁州

響堂寺續寰宇訪碑錄同

薛宏道造像記 行書開元七年在磁州響堂寺畿輔碑

同目

韓迴秀造像記 正書開元十九年在磁州鼓山石洞

畿輔碑目同

案金石分域編畿輔碑目有殘造像記二種無朝代年月而列在唐代通志沿之列在韓迴秀記前今不

錄

口貞妻口甫五娘造觀世音像記 正書凡五行首行  
成安縣人四字甚清末行書開元二十三年四月二十  
三日在響堂寺

案金石分域編貞上空二格下空二格通志貞下加  
妻皇甫三字今考此刻實無皇字妻字甫字亦約畧  
似之也

清漳縣令秦獻造像記 正書兼行書字可辨者八十  
行末數行剝蝕行二十二字在肥鄉縣東三十里大寨  
村前三行開元十五年歲次丁卯正月甲戌朔五日戊

寅朝散大夫洺州清漳縣令上柱國秦獻奉為開元神  
武皇帝敬造七級石浮圖一所彌陁像一鋪清涼菴以  
下記文四六書法秀挺頗有褚法清涼菴三字似後人  
刻刻

大寨村故城址盡廢城隍廟尚存杜佑通典云安陽東  
北去肥鄉城一百四十里今肥鄉去安陽一百一十里  
大寨在縣東北三十里里數適符明光宗元年土人掘  
井數丈得清涼菴石碑蓋唐開元清漳令秦獻造也  
縣志  
明天啟丁卯清漳村民掘井得斷石畧云開元丁卯洺  
州清漳縣令秦獻為神武皇帝造七級石浮圖彌陀像  
清涼菴京  
畿金石考

案明天啟丁卯乃熹宗七年縣志稱光宗元年掘得

似不若孫說之有據

張五姐造阿彌陀佛像記 正書石廣五寸長三寸碑

文四行天寶元年四月四日造阿彌陀佛像主張五姐

共二十字佛像在碑文之左同治十二年臨洺關人濬

井得之

縣志

今歸江蘇夏氏

探訪冊

隆興寺造石佛像記 在清河縣城西南今寺多圯廢

前殿背負壁尙有白石佛一尊高九尺鏤刻精工背刻

唐大曆十年造

京畿金石考兼探訪冊

郁久閻明達等題名 永年趙上壽刻石後有郁久閻

明達題名

畿輔碑目

婁山題名殘石共四行一曰監軍判官濟陰郁久閻明達一曰侍御史魯國郡一曰洛州刺史一曰范陽盧瑱餘磨泐不可辨考宇文周建德六年改廣平郡爲洛州郁久閻柔然姓隋唐以後此姓鮮矣 縣志

案今題名在豬山頂趙廿二年石刻之東字七行行

款參差多少不一其可識者一監軍判官濟陰郁久

閻明達侍御史魯國郁士美一洛州刺史范陽盧瑱

一處士盧叶夢夢字左行下爲監察御史劉荆海一

邢州別駕楊審言一〇〇縣尉李嘉同〇登此後一

行爲九月廿八日五字考魏書蠕蠕傳蠕蠕姓郁久

閻氏郁久閻卽木骨閻首禿也后妃列傳有景穆恭

皇后郁久閻氏而列傳又有閻毗閻大肥皆蠕蠕人

蓋郁久閭又可省稱閭也北齊有郁久閭業碑見金石錄目舊唐書職官志節度使所屬判官二人天寶後置此郁久閭稱監軍判官則爲唐人無疑蓋唐時此姓猶有存者集古錄目有禱聰明山記洛州刺史盧頊撰元和二年七月立記云頊謬職分符今逾一紀據此則刺洛之始在貞元十一二年宰相世系表載盧頊澤州刺史從其終官之年言也郁士美新舊唐書皆有傳高平金鄉人故稱魯國其爲侍御史傳皆不載以官階考之當在爲坊州刺史之先其由刺史擢至安黃節度傳在貞元十八年則題石在此前

數年可知今石刻後一行惟九月廿八日五字尙可辨亦不能定其爲貞元某年也世系表李氏名嘉者三人惟趙郡李嘉興與題名時合然不著其官則亦未必卽此人也樊彬碑目及續訪碑錄皆列入石趙時誤

達摩大師碑 正書凡二十八行序文二十四行前有題一行撰序人名一行末有朝代年月銜名二行元和十二年五月十一日篆額三行題禪門第一祖菩提達摩大師碑十二字陰文在今磁州東北二祖村元符寺案此石拓僅上半截字摩泐不多結體圓潤第二行

僅見梁武帝三字序蓋武帝所撰也後銜有昭義監軍興元元從登仕郎字末行有中大夫檢校工部尙書兼潞州大都督府長史御史大夫充昭義軍等字考唐書地理志磁州本昭義軍節度所轄之地永泰元年昭義節度薛嵩請於滏陽復置磁州是也惜下截久沒土中立石姓名未得表著

五代

摩訶般若波羅蜜佛題字 正書三行天祐十五年修造昌樂縣口口在磁州響堂寺

案昌樂唐縣屬河北道魏州今南樂縣治此刻昌字

上有口州二字當卽魏州也其旁又有兩行題名首行禮拜佛三字可見次行魏州昌樂縣人劉口八字想亦同時刻也

二賢堂碑 天慶觀在磁州城內樂善坊西天福年建立今遺址無存惟有二賢堂碑文州志

宋

隆興寺古鐘 在清河縣城西南隆興廢寺採訪冊

案採訪冊宋太祖重修梵宇極宏麗歲久傾圮惟前門古鐘尙存考吳浚碑記宋乾德五年重修寺塔鐘當爲此時鑄也

隆興寺定光佛墓碑 在清河隆興寺東佛藏舍利於

此宋吳浚勒小碣記之尙存書字遒勁有二王法

京畿

石考

案文畧云仁壽二年奉安定光如來真身舍利於此

塔先是兵亂閹闔失守遺基莫覩有僧超一特興至

願化導二十載復有故府王侍中清河公光翰共成

勝事乃於本寺內建造磚塔一所共一十二級高一

百三十丈塔內又造石棺一棺內又造金棺銀槨金

瓶各一所越以大宋乾德五年歲在丁卯四月八日

丙寅舉舍利二粒指骨一節於其內以安置焉云云

清河公光翰不著其姓未詳四史朔閏考乾德五年

四月己未朔以之下推八日丙寅正與碑同

崔相公人戶綦珪等造像記 正書凡五行太平興國

七年四月廿一日修在磁州響堂寺

案是刻首列磁州滏陽縣次行有十方院修到彌勒

佛壹尊三行邑人皆誤爲壹人蓋淺人所刻也

大觀聖作之碑 行書凡二十三行額正書六大字在

威縣文廟

案此碑前四行爲八行詔總敘中爲八行條教後三

行大觀元年九月侍讀鄭居中奏乞以御筆八行詔

重修廣平府志 卷三十五 金石路上

旨摹刻於石立之宮學次及太學辟廡天下郡邑二  
年八月奉旨以御筆賜禮部尚書令以所賜刻石末  
又有五行官銜姓名首行政和三年大名府宗城縣  
奉勅模勒上石未行太師尚書左僕射兼門下侍郎  
魏國公□□奉勅題額考宋史大觀三年何執中  
代蔡京為尚書左僕射兼門下侍郎政和六年罷此  
額或即執中題也

宗城縣新修廟學記 正書政和三年秦垣撰牛直孺

書在威縣學 畿輔碑目同

案縣志此記宋政和間恩州教授陽翟秦垣撰碑文

畧云北都畿邑十二其東皆富盛其西弊宗城舊治  
雉川崇甯四年始遷邵固名雖為縣實不若堡鎮之  
雄者唯是學校之興遵用崇甯二年詔書肇造聿新  
於是堂皇宏麗為他縣最通直郎牛直侯洵仲為是  
邑之二年馳書託為載其興廢以題其事云孫星衍  
金石考列入大名誤

劉霧題名 正書在永年縣豬山

案此題名句當虞侯劉霧六字在豬山摩崖郁久閭  
明達題名旁考宋節度觀察團練防禦等使其所屬  
官皆有虞侯句當字與檢校同義宋時多有此稱百

官志間亦見之曹彬自署曰江南句當公事回卽此義也金元以後遂以句當爲實職之稱如某某府戶句當官之類甚多與此句當虞侯字義稍有區別此當爲宋人刻石也

金

太平興國禪院鐘 高七尺五寸圍一丈三尺五寸向在成安城東南隅舊縣儒學櫺星門內金大定十七年

鑄縣志

今在文廟東字多剝蝕不清

採訪冊

重修普會禪院記 正書兼行書在永年縣東北二十里下堡店村外碑廣三尺高七尺二寸碑文二十三行

行六十字篆額三行題曰重修洺州永年縣普會禪院記首行文同末行正隆三年正月十有一日記前有小字三行承事郎致仕郝大亨撰徵仕郎何思篆額從事郎李德華書丹碑文後結銜四行承信校尉行洺州永年縣尉飛騎尉苗侃儒林郎行洺州永年縣丞武騎尉尉賜緋魚袋張口儒林郎行洺州永年縣令騎都尉宏緋魚袋劉公柄建威將軍行洺州永年縣令騎都尉宏農縣開國子楊珏下行二行一爲都修造功德主任持管句院事沙門智安一爲本州東羅漢院講大乘百法明明論沙門洪演立石再下爲潞州襄垣縣張舜張受



刊等字

案縣志撰文人郝姓誤為柳篆額人名思誤為恩書  
丹銜職從事誤為將事碑文行六十字誤為三十末  
行三十七字誤為三十一結銜姓名楊珏誤為班碑  
尾下二行字皆清楚志云僅辨住持管院事沙門智  
安九字餘磨泐今特錄出全文以證其誤

新修宗城宣聖廟記 正書碑文二十五行行六十字  
額三行正書宗城縣新修宣聖廟記九字首行題同額  
次行清河郡開國侯傅慎微撰仙巖翟炳書并題額末  
三行結銜姓名正隆三年四月立石在威縣文廟

案此碑文末云正隆丁丑孟冬晦日撰記丁丑是正  
隆二年蓋撰文在二年立石在三年也舊志作正隆  
元年誤撰記作傅慎尤誤寰宇訪碑錄作僧慎微撰  
更誤通志兩載蓋未見石刻也

清河縣移學碑記

正書王堪撰大定四年

金石分在域編

清河縣治東南隅知縣劉惠等建王堪記

府志

案此碑文題云金翰林瑯琊王堪撰其文略云清河  
在齊阜昌初徙治厯亭而清河遂為屬邑郡庠初居  
譙門之西遭水患齋宇蕩然大定癸未建安張格來  
佐是邑請於邑令劉惠卜縣之東南隅為宣聖殿經

始大定四年三月落成於五年九月考王堪金史無傳清河在宋金皆屬恩州宋治清河金治歷亭見兩史地理志惟改治在偽齊僭竊時則金志未詳諸史志地於廢置歲月尠能備晰據此可證其脫漏又案恩州在宋爲清河郡軍其始曾升爲節度後罷碑中有宋監司公署一語蓋猶是節度使署故址也又案癸未乃金世宗大定三年張格以是年莅官四年修學五年落成卽以落成之年刻石分域編作大定四年誤

重建響堂寺殿題名 正書一行在磁州響堂寺洞門

柱上大定十年四月廿三日□□彭城村陳氏蓋殿壹座凡二十字蓋金時重修所記也

重修洺州曲周縣學記 行書碑文凡二十二行行五十四字碑首一行又有結銜三行朝散大夫景州刺史靳子昭撰翰林院學士知制誥編修國史党懷英篆額將仕郎曲周縣主簿趙元英書丹碑斷爲二泐數十字在曲周縣文廟

案是碑無立石年月末行云學始作於大定乙巳成於丙午後明昌□□□□望日前進士信都靳子昭爲之記案乙巳爲金世宗大定二十五年至明昌而

始作記是廟成後復遲五六年始立石也

勅建至聖文宣王廟碑 正書在肥鄉縣文廟首行題  
洺州肥鄉縣勅建至聖文宣王廟碑次行始平縣開國  
子賜紫金魚袋龐雲撰泰和四年立石

案碑載泰和元年頒令天下建學舍一條金史章宗  
本紀及禮志皆失錄據此可補闕漏充國公顏子鄒  
國公孟子配祀宣聖象左右始於金大定十四年見  
禮志此碑立於章宗朝故云於大成殿塑宣聖及顏  
孟象乃遵新制也王天衢乃邑進士見學宮題名碑  
投牒碑 王天衢撰在肥鄉縣明倫堂碑石光瑩可鑑

潔白無瑕 畿輔通志

案龐雲文宣王廟碑文有諸士人願以家資出助而  
以狀聞於君之語即此牒也廟碑立於泰和四年此  
亦當同時所建

邑進士題名斷碑 在肥鄉縣文廟金時甲乙之科傳  
者寥寥茲得之學宮斷碣無年月可考題名所存者王  
天衢周世臣等十二人詳選舉

勅建洺州雞澤縣文宣王廟學記 正書凡二十一行  
行六十三字前尙書左丞漳川董師中撰并書朝請大  
夫翰林口侍講學士知制誥党懷英篆額末後下截又

有六行皆同建職官姓名崇慶二年五月初十日立石  
在雞澤縣學

金承安三年知縣高瑒建洛州尚書左丞董師中撰并縣志

大安十年董師中撰并書雞澤 畿輔碑目

此碑見存其略云承安三年正月高瑒由岢嵐州司候廉陞來此以學校不修銳意興建卜築縣之東南隅經始於是年五月畢功於四年六月既落成告漳川居士董師中為文以記始末考董師中金史有傳洛州人官終尚書左丞泰和二年卒此廟學建於承安四年縣志作三年乃僅據經始歲月未觀下文尚有四年落成之語此縣志之誤也衛紹王偁位師中卒已久則書撰此文時當在泰和二年以前蓋越十載至崇慶二年始上石耳分域編及樊彬碑目所據乃立石年月也衛紹王大安四年即改元崇慶並無十年之久遼道宗西夏惠宗皆有大安十年樊彬碑目既載董師中撰書又編入遼代大謬 畿輔通志

碑陰題名

勅建廟學唯邨姓名正書

金石分域編

案唯邨乃浮圖氏之稱六朝造佛像題名往往用之  
此乃施諸文廟不經已甚金源之陋於此可見

元

元貞觀碑

在磁州大于里甲辰年建元末毀於兵惟

有碑存

州志

案元自太祖建國有天下歷太宗至憲宗凡四世皆  
不建年號此甲辰年當是六皇后稱制之三年即宋  
理宗淳祐四年也

上清觀常住地數目碑

正書中統五年五月

金石分域編

在肥鄉

案元史世祖本紀至元元年八月詔改中統五年為至元元年此碑以是年五月立時尙未下改元詔故猶用中統年號

達魯花赤僧住齊政碑 正書在永年縣西臨洛鎮

碑廣二尺高四尺題額三行永年縣達魯花赤僧住齊政碑首行字同碑文十三行下半字數磨蝕不可辨前後結銜各三行後進儒人金永口撰延安路蒙古字學教授李口書廣平路儒學正董從善題額將仕佐郎承年縣主簿張煥承務郎承年縣尹兼管本縣諸軍與魯勸農事劉源將仕佐郎承年達魯花赤兼管本縣諸軍與魯勸農事僧住年月一行至元四年八月初八日馬莊社長文憲等立碑文殘缺釋其文蓋僧住修葺驛會士民立碑頌德也未西行似銘文語拙書劣惟題額十二字秀整有法度考元制府州縣各置達魯花赤一人

上縣秩從六品中正七下從七中下不置丞今結衛有簿無丞是當時官制在中下之間也元有兩至元考府志張煥在金為肥鄉令劉源元初為威州州判碑當建于世祖時歟 縣志

案此碑文作后進儒人滏水口峙撰教授李下尙有

兩字磨泐董從善董字亦泐與縣志異末行社長張

文憲等縣志脫張字

昭文館大學士竇默神道碑 正書碑陽碑陰皆二十

二行至元十七年命翰林學士王磐撰文山東提刑按

察使胡祇適書丹前參知政事樞密副使商挺篆額在

肥鄉東十里

案碑文首云至元十七年秋七月十有二日照文館

大學士正議大夫竇以疾薨於京師訃聞上深悼惜  
賻恤其家甚厚皇太子送楮幣二千緡以供葬事以  
是年十一月庚戌日葬於廣平府肥鄉縣興教鄉之  
先塋皇太子令旨命翰林學士王磐撰碑文碑中事  
與元史詳略互見默初名傑碑及本傳皆詳言之樊  
彬碑目既列此碑又列王磐撰竇傑神道碑於後誤  
也惟元文類編有李謙撰文正竇公神道碑銘今未  
見此刻本

玉清神霄萬壽宮鐘款 正書至元二十三年十二月

金石分  
域編 在磁州

清河縣重修廟學記 正書十八行碑首一行前結銜  
三行大名路管領儒人前教授魏天章撰清河縣教諭  
胡元紹書聊城後進劉允祖篆額下半斷為兩截泐二  
十餘字在清河縣儒學

碑陰 正書文七行結銜六行年月一行後又有助工  
銜名六行四層大德十年閏正月初八日立石

案碑陽文云經始於至元三十一年十月落成於元  
貞元年口月元世祖以至元三十一年崩成宗卽位  
詔改明年為元貞則至元並無三十二年縣志以為  
至元三十二年立石誤又案碑陰文言前任伯拗友

修學已成今逾一紀碑文尙未立石大德中達魯花赤沙的同僚屬申從敬等爲置祭器礮石以竟其功云云是修學落成在元貞元年而立石確在大德十年也通志以爲元貞立石亦誤

加封孔子制誥碑 大德十一年閻復撰在肥鄉儒學

畿輔碑目

加封孔子制誥碑 正書字大三寸凡八行鄧琦書大

德十一年十二月二十六日立石在雞澤縣文廟

求是齋藏碑目

大成至聖文宣王碑陰頌 正書字大二寸凡九行同

知將作院事鄧琦撰前雞澤縣尹徐介書開府儀同三

司趙國公王顒題額皇慶二年五月立石在碑之陰

案金石分域編作鄧琦題額誤

加封孔子制誥碑 正書大德十一年閻復撰在威縣

儒學

加號大成記 正書王再思撰郝伯隆書宋太不花題

額至治癸亥正月立石

金石分域編

案癸亥乃至元三年此碑與前制誥碑是一石蓋大

德制誥通頒天下凡各路府州縣皆例得於儒學立

石以垂永久此碑立於至治三年上距大德十一年

已十七載或詔書頒行遲久而後上石耶抑大德間先刻詔書至是續鐫記文均未可定

靈惠齊聖廣祐王廟碑 正書碑文二十三行行六十八字堅勁方正惜多漫漶碑首一行上磨泐中有聖旨□□靈惠齊聖廣祐王廟碑等字前有結銜三行翰林直學士奉政大夫知制誥同修國史王德淵撰前集賢學士通議大夫劉恣□書昭文館大學士榮祿大夫平章政事預中書省事何榮祖篆額末有年月一行至大二年仲冬上旬七日廣平路磁州知州兼管本州諸軍奧魯勸農事劉大本立石在磁州城內

案舊志磁州有崔府君廟碑在州治東北王德淵撰蓋指此碑通志謂廟以大德三年重修立碑當在其時蓋亦懸揣而斷也

元氏新阡墓表 元明善撰在清河縣西王家原探訪冊案元貞碑稱明善於延祐七年為孝靖公樹碑則樹此表亦在同時又案元貞葬清河新阡此云新阡墓表當與前碑同在一處

鐵獅題款 正書泰定二年金石分域編在磁州崔府君廟石獅題字 在成安縣儒學前門左右元泰定三年二月辛未日彭城趙氏置滏源石匠史通造縣志今字多剝



蝕探訪册

重修李衛公廟碑 馬煦撰泰定三年立在磁州探訪册

重修廟學記 正書國子助教東郡楚惟善撰蕭伯顏

書丹俎冕篆額至順二年季夏立石金石分域編碑陰題名

在威縣文廟

案樊彬碑目作至大二年誤

聰明山禱雨詩刻 正書詩五言四句廣平路監郡復

菴公朝列撰初題於壁上至順二年秋九月永年縣尹

師彥瞻刻於石并記其緣起在永年縣臨洛關西明山

廟

四鄉新名記 正書李尊撰至順二年立石

案記文云至順改元進士帖木兒溥化來監是邑析

里社為四鄉而表以新名東名息津西名服義南名

興賢北名昭德前監邑壽子年令劉志仁簿趙傑耐

趙天佑合辭贊之囑為之記文諸石以諗來者案至

順乃元文宗紀年

洺國公太傅王磐神道碑 張晏撰在永年城北孫陳

莊金石分域編

案永年縣志此碑在縣北三十里曲陌鎮首行題大

元故翰林學士承旨資德大夫端貞雅亮佐□□□

太傅開府儀同三司追封洛國公諡文忠王□□碑  
銘并序結銜二行集賢殿大學士昭□□大學士榮  
祿大夫司農兼御史中丞張晏撰并書朝散大夫大  
名路同知李擘篆額碑文十八行行八十字銘四行  
行六句末行至元三年歲在丁丑夏四月辛未朔越  
四日甲戌立石此蓋順帝至元三年也碑載磐走襄  
陽宋將聞其名置議參軍史傳所不及又磐題三教  
坐立像載說部實見之此碑也惜石刻多剝蝕

縣尹劉明善德政碑 正書在雞澤縣迎恩街關帝廟  
前至元十年爲知縣劉明善建中山府判官胡仲昇記

雞澤  
志

案文稱明善大名人至元己卯宰是邑三年考績去  
考元世祖至元十六年歲建己卯順帝至元五年亦  
建己卯明善於己卯始宰此邑碑中又有至元六年  
歲稔之語則非前至元可知而後至元無十年之久  
縣志稱至元十年立石誤也

肥鄉縣重修廟學碑 正書朱繼雲撰至正六年立石  
在肥鄉縣學

案碑文云至正乙酉肅甯令張皞調合是邑下車慨  
然以學校爲治道先謀爲修復監邑塔失不花主簿

韓涪縣尉張元英典史齊榮祖叶其議迪學官郝恒  
文其事以請仍出楮幣給其須尹遂倡割俸佐之捐  
者相屬工踰半尹以病歸監邑及簿代之越明年丙  
戌雍兀刺歹李居敬典史劉守中踵其事落成焉考  
乙酉乃元順帝至正五年丙戌為至正六年

雞澤縣重修廟學記 正書盧明福撰盧友諒書丹并

篆額至正九年四月立石在雞澤縣學

金石分  
域編同

碑陰題名 正書修學助力人名

同上

普會寺真堂記 正書記文二十行銘詞五行碑首一

行十方普會禪寺創建真堂之記額三行前銜二行鄉

貢進士曲梁馬信撰山後人何懿篆額書丹後有歲月  
一行至正十二年歲次壬辰冬月壬子立石末銜三行  
皆沙門道號也在永年縣東北普會寺

普會寺免糧稅聖旨碑 正書二十四行末行至正十

四年馬兒年夏四月十九日在永年縣東北普會寺

縣尹霍安道惠政碑 正書在雞澤縣城迎恩街關帝

廟前至正十四年為知縣霍安道立汾州教授郡人邢

獻臣記

縣志

威州重修公廨記 正書元至正十四年鄉貢進士郡

人劉謙撰在威縣

金石分  
域編同

案文畧云威州轄縣二曰洺水曰井陘前至元初州治由井陘徙於此至正庚寅詔汰冗官洺水革去州於是乎親民知威州事王朝列下車之初適其時也云云案庚寅乃順帝至正十年元史本紀是年無詔汰冗官事據此可補史闕

清河縣重修廟學記 正書兼行書碑文十四行行四十八字碑首一行前銜一行太子文學楚惟善撰東平鄉貢進士高良弼書丹篆額後有歲月一行至正十七年歲次丁酉仲夏立石後銜五行字有趙子昂筆法在清河縣學

戶部尙書馬煦墓碑 正書虞集撰在磁州西十里槐

樹村有碑銘州志

案此文虞集撰見道園學古錄其畧云公諱煦居磁之滏陽初補大司農史延祐三年以戶部尙書致仕大行之麓有神麴山泉石幽勝公歸與門人息游其間卒年七十三馬氏之塋始在郡西南陽城里今葬屯川者自公始

趙國公大司徒何榮祖墓碑 正書劉賡撰在永年城

西二十里周村探訪冊

趙國公吏部尙書吳元珪墓碑 正書鄧文原撰在永

年臨洺鎮南探訪冊

翰林學士張之翰墓碑 正書李謙撰在邯鄲縣東劉

村今碑刻尚存

縣志

河南行省左丞元明善神道碑 正書在清河城西三

里御史中丞馬祖常撰神道碑歲久碑沒明嘉靖辛亥

邑人馮盛時孫沈請於令復為礮神道碑鑒於道左

縣志

明

石獅題字 正書在郡城東門外

案通志列入元代無年月今考此題字四行首行是

大明嘉靖二年六字上四字磨泐微有字形次行口

月中旬口三行宅字四行吉字尚可辨

夫子廟堂記 隸書凡十行行二十五字在府學大成

殿左字大二寸渾樸端勁有夏承碑筆法唐駕部郎中

程浩撰後有題跋四行明永樂十一年癸巳冬中順大

夫守廣平荆南陽浩大宣跋下有同知通判等官姓名

旁又有小字四行言野仆無字碑郡大夫命左右致之

以成其善事端齋盧臻識

案盧臻即當時同知也

婁山題名 正書二字大徑尺遒勁有筆力嘉靖二十

九年秋七月欽差整飭大名等處兵備副使陳大賓題

廣平府知府瞿晟立在永年縣西狗山又有房山二大

字在永年縣西紅山上歲月題款均與婁山題名同

贈盧大中太子太保誥命 行書凡三石六十八行行

四五字不等大徑寸未有年月一行崇禎六年十月董

其昌書後又有跋語十四行在永年縣西北劉瑩村盧

氏家廟董其昌跋云大司空盧公清標直節彪炳三朝其昌昔奉使南都得接丰論巖巖在目迄今可想適因長公隣虛請書其贈語欣然以顏法應之其高風可匹也

然以顏法應之其高風可匹也

其昌書後又有跋語十四行在永年縣西北劉瑩村盧氏家廟董其昌跋云大司空盧公清標直節彪炳三朝其昌昔奉使南都得接丰論巖巖在目迄今可想適因長公隣虛請書其贈語欣然以顏法應之其高風可匹也

重修廣平府志卷三十六

金石略下 古有今無

周

馬服營方足布 馬反呂反卽服省呂卽營省齊營刀

營作呂可互證或曰馬陵或曰馬首貨布文字考釋為

馬服營今從之史記趙惠王二十九年使趙奢擊秦賜

號馬服君括地志馬服山在邯鄲西北營市居也古泉

古泉匯又圖別一品馬字倒書作反作有呂字在左足稍偏陰有三字左右兩小畫之中而居中一直空其半又有馬反呂自左讀背文八又有背無字見貨布文字考此別一品字反書馬作在下有十字在布之左半反作目呂字與他品同皆在右半陰面中左右各起一線而左右兩線之間各有一小曲合成以形古泉匯以

為八字良是  
畿輔通志

甘丹大尖足布 此布較大邯減筆作甘鄆作丹諧聲  
亦減筆也國策使王齧代王陵伐趙圍邯鄆係趙地古泉

匯

古泉匯圖此布寬周尺一寸九分弱足如垂翅稍寬高  
二寸九分首高一寸九分弱寬八分上豐下銳周轉咸  
有廓布首亘起二線及肩而止肩以下居中一線字在  
線之左方日且二字倒書蓋周以前泉刀皆有穿貨布  
則無穿故其首稍殺以便取攜手執之以向上則字可  
順觀且在右方矣陰無字首至肩中一線以下左右各  
一線與陽面異又有甘丹大尖足布同前背紀數在右  
貨布文字考釋為甘井引史記索隱屬涿郡戰國時為  
趙地其說亦可據此二品大小與前同其一陰面右一  
筋左右各一小筋如入字其一Y形與右一筋連古泉  
匯釋為二字六字亦殊影響也又案日月二字明明是  
甘丹間有他品作井月者乃磨泐決非井字矧邯鄆乃

趙之國都春秋時為趙氏采邑左傳趙午據邯鄆以叛  
即其地也太平御覽云邯鄆本春秋時衛邑哀四年趙  
鞅降之至肅侯始都焉趙國故鑄不於其都而  
於邊境小邑之甘井亦斷無是理 畿輔通志

甘丹大空首布 甘丹即邯鄆茲二字在右之上背亦  
作三直文與面同布之大倍於常而輕薄如葉乃空首  
布之奇品與尖足甘丹布應是一處物古泉

此布高周尺四寸寬二寸三分有奇上下皆豐中稍窪  
侈肩尖足四周有廓居中三筋字右筋之右順書日月  
二字極小首高二寸三分寬七分  
分有弱上豐下銳平面無廓

甘丹刀 面文甘丹即邯鄆或釋甘井二品微分大小

背俱無文古泉

此刀大者長周尺六寸二分有奇寬八分柄寬五分下  
有穿如環刀形微曲首圓類莒刀與齊太公貨尖首者

異甘井二字居中小者長六寸寬六分柄寬六口形與大刀同字泐僅井字略可見又案古泉匯甘丹四品其一面文丹字中一點上橫畫不透出與尖足大布同不類井字釋作丹字益信背申七六十等字中字見齊刀貨字減作七傳形亦與齊刀同六字橫書類馬字與邑布及列國刀背文同 畿輔通志

漢 趙王張耳墓石 在成安縣東北三十里沒於漳水誌

石尙存字剝蝕難盡辨 京畿金石考今沒採訪

墓在城東北三十里北珠村東沒於漳石在北珠關帝廟內字雖剝蝕猶有可考者 縣志

案通志此碑前代著錄家皆未見採入當為後人偽作然亦不能定為何代石刻姑從諸家列在漢以俟考

太尉李固墓碑 在磁州東諸瞿村固東漢人有名德

為梁冀所害碑刻尙存 明一統志

案此碑久沒又無年代可稽姑依明統志列次東漢

李雲墓石 淇水又東北過廣宗縣東為清河清河之

右有李雲墓後冀州刺史賈琮使行部過祠雲墓刻石

表之今石柱尙存俗猶謂之李氏石柱 水經注

案地理志今釋北魏廣宗縣隸司州廣宗郡在今直

隸廣平府威縣東二十里又案清河即古漳水今已

淤塞在今威縣治東雲墓既在清河之右則亦當在

威縣境內



魏

石鼓山銘 溢水發源出石鼓山南巖下崖上有魏世

所立銘水上有祠能興雲雨水經注

此水經注逸文今本無此條茲據太平御覽所引錄入其年月無可考釋其文義乃論占之辭其不曰魏某某年刻而曰魏世所立疑指曹魏而言磁在漢魏間為魏郡武安縣地與鄴都毗連登封刻石事所應有御覽又引水經注云石虎時自正月不雨至六月浮圖澄日詣溢祠稽首暴露當石虎僭竊時拓跋什翼犍亦始建國其時鼓山已有神祠久著靈應則勒銘當在立祠之初其非北魏所刻無疑也畿輔通志

岐安墓碑 在磁州舊志隋圖經云岐安塚在魏武陵東

三里安死後鬼每語其子逸云吾塚近武帝陵見攻伐

為吾辭逸等即以碑碣勒石謝乃止太平寰宇記

晉

陸雲墓碑 雲為司馬穎殺門生故吏迎葬清河修墓

立碑四時祠祭晉書本傳

大長秋游述碑 並碑陰云君諱述字庶祖廣平任人

也晉泰始十年九月乙丑卒咸甯三年九月甲子造寶刻

叢碑在永年畿輔待訪碑目

右游君碑陰案王莽嘗下令禁二名故當時士人皆以一字為名東漢時尚爾今此碑陰所記凡二百五十三人亦無一人二名者碑晉咸甯中建距莽時二百年矣而士大夫猶遵莽之令不變何哉金石錄

案泰始咸甯皆晉室紀年寶刻叢編列入魏碑誤

北魏

征西將軍鐵印 萬歷間廣平縣馬家莊居民掘出鐵印一顆鑄文云征西將軍印獻之藏縣庫

縣志

案通志云魏書官氏志有四征將軍此征西將軍印四征之一也

公主墓石 在磁州南八里官路西申家莊後公主名季豔孝文帝之孫太師廣平公之女太尉貞平公之妻

舊志

案通志魏孝文帝子廣平王懷魏書北史有傳皆闕佚不全其官太師事傳亦失載更無論公主矣太尉貞平公既無名姓尤不可考府志載此墓而未及有

碑與否然繹其語義的係碑版中錄出者且史傳既未詳又何從知公主名字及譜系若是之悉耶必有墓石無疑

相州刺史徐雅碑

不著書撰人名氏天平二年立

寶刻

叢編在永年

畿輔待訪碑目

東魏

齊獻武王高歡墓石闕

滏陽縣東魏二陵孝靜帝父

與靜帝陵也高齊神武陵在二陵之側去縣三里今有

天鹿石闕

太平寰宇記

案通志歡卒於東魏武定五年正月以八月葬於鄴

西北漳水之西此石闕卽以是年造也又案高澄虛葬神武於漳水西潛鑿鼓山石室佛頂旁爲穴納其

齊公主墓碑 曹操疑冢七十二散在數里間往歲凶

荒民盜發冢者皆有屍一題碑額曰公主爲齊王四妹

由此類推則疑冢之說不足信矣

范成大攬轡錄

案通志此齊王非神武卽文襄因攬轡錄又有齊獻武子之冢與此同列一處也惟公主爲史傳所不載

無可詳考

北齊

王起碑 起一作超寶刻叢編碑在永年畿輔待訪碑目

崔顛墓誌 天保四年在清河畿輔待訪碑目

崔顛北齊書北史皆無傳唐書宰相表鄭州崔氏有其名仕後魏爲平東府諮議參軍其始世居清河東武城及顛子蔚始遷滎陽蔚之子暹仕周爲瀛州刺史北史入酷吏傳而暹傳中亦不載其父祖名無可援證其卽此崔顛與否未敢臆斷  
畿輔通志

隋

涓于儉墓誌銘 開皇八年在清河畿輔待訪碑目

案儉隋書北史皆無傳

隆興寺定光如來真身舍利塔記 貝州隆興寺舍利塔者耆舊傳云定光如來真身舍利有碣石記仁壽二

年奉安於此宋吳浚定光佛墓碑

刺史竇宗墓碣 在磁州西五十里鼓山巔墓地周圍

四十餘畝有石碣舊志

唐

婁山石刻 唐壘在縣西南婁山頂唐書地理志太宗

擊劉黑闥於此上有石刻永年志

唐書地理志河北道洺州臨洛狗山有太宗故壘討劉黑闥於此太平寰宇記狗山在臨洛縣西十里山頂石上有狗迹因名唐武德五年太宗親總戎討劉黑闥於此立營皆無勒石語縣志云上有石刻沈濤續廣平府志亦云此山有唐太宗碑蹟因往山遍訪不得兩志所載皆同似非無稽 畿輔通志

二祖慧可禪師墓碑通志金石略作元符寺在磁州

東北相傳二祖禪師涅槃之所唐貞觀十六年建寺開

元二十年建塔磁州志

驍騎尉毛藻墓誌銘 在雞澤縣西南十八里唐人撰

府舊志

誌稱咸亨四年二月二十七日終於私第以上元二年歲次乙亥二月乙卯朔十日甲申遷窆於城西八里之平原考唐紀年有兩上元一高宗時甲戌終乙亥一肅宗始庚子終辛丑此上元歲建乙亥又在咸亨之後乃高宗紀年也 畿輔通志

望都主簿韓固文墓石 在雞澤縣西八里案墓石內

稱葬於城西北十五里唐時城在馮鄭莊與今縣西八

里合雞澤志

碑文稱君解褐為陝州芮城縣尉調滄州鹽山縣尉遷定州望都縣主簿以儀鳳二年臘月十九日年五十有五卒於官長安三年十月十二日祔葬於縣城西十有五里之先塋云考唐書地理志陝州無芮城縣舊唐書地理志有之注隋縣武德二年置芮州領芮城河北二縣貞觀元年罷芮州以芮城河北屬陝州據此碑可證舊書之有據又可糾新書之闕漏也 畿輔通志

霍宏泰造石浮圖銘

心經石刻 唐相州成安縣霍宏泰造石浮圖銘并心

經正書太極元年二月在城西郎堡圓銘寺金石分今

無考採訪冊

圓銘寺在城西十二里郎堡村唐太極元年壬子二月十三日建有古柏石浮圖俱千年遺蹟 成安志

貝州刺史宋慶禮墓誌 在邯鄲縣西二十里巖崩村

舊志以此為宋璟墓有盜竊發知府秦民悅訪於故老

得民家所藏唐宋慶禮墓誌石以此知非璟墓也舊志

廣州都督府司馬宋慶賓墓誌 在邯鄲明知府秦民

悅并訪得宋慶賓墓誌石舊志

石刻宋慶賓勅詞 明知府秦民悅於民家并得慶賓

所受勅詞小碣一通其詞曰臨事明允須居令長雅聞

聲稱控帶百越朝宗萬里端察之任舉才攸屬可守廣

州都督府司馬散官如故仍馳驛赴任主者施行開元

二年九月十一日正當時殉葬之物也舊志舊在愛古軒

壁京畿金石考

案金石考及碑目均列入宋代誤

日愛寺碑 唐何榮光書開元二十六年立在邯鄲縣

東北上壁村 寶刻叢編

何榮光日愛寺碑開元二十六年立磁州 寶刻類編

案邯鄲縣宋隸河北西路磁州故以下四碑寶刻類

編皆列在磁州

大行禪師義方訓石刻 何榮光行書開元二十六年

二月在邯鄲 金石錄目

何榮光大行禪師義方訓開元二十六年二月磁州 寶刻類編

大行禪師幢銘 韓覃撰並行書開元二十六年二月

金石錄目 在邯鄲縣 寶刻叢編

韓覃罔極寺大行禪師元德幢銘開元二十六年磁州 寶刻類編

登叢臺懷古賦石刻 唐嚴浚撰蔡有隣分書開元二

十七年秋立在邯鄲 金石錄目

嚴浚登叢臺賦蔡有隣分書開元二十七年秋磁州 寶刻類編

洺州司馬龐承宗碑 在邯鄲縣 寶刻叢編

李興造石浮圖記 李季良撰李燧正書開元二十八

年正月 金石錄目 舊在廣平府署 畿輔碑目

林留生妻楊等造石浮圖題名 行書無年月在佛龕

東面 金石錄目 域編

□淨業造象 又尊者加樓那畫像并菩薩主□淨業

題名正書無年月在佛龕後金石分域編

案以上二石無年月可考以與前石浮圖記同列一

石當是同時所造也畿輔通志

立漢世祖祠記 張邈撰梁游楚分書天寶二載四月

立寶刻寶刻叢編

漢世祖廟碑天寶二年張邈撰梁游楚分書永年 畿輔待訪碑目

聰明山神祠記 張造撰正書無姓名大曆七年立山

在府城西六十里京畿金石考

秘書監程元英碑 北海太守李邕撰黃門侍郎張廷

珪八分書元英字文繹廣平人官至桂州都督府長史

贈秘書監碑以大曆七年五月立集古錄目

霧睹寺古塔 在成安城東北十八里閻村店中有古

塔唐天寶間造成安志

案通志云縣志不載塔上有字與否然既云天寶年

造必據其題款採入者今錄之俟考

聰明山銘 洪經綸撰張沔八分書建中元年六月立

寶刻叢編

張沔聰明山銘洪經綸撰八分書建中元年六月立洛州寶刻類編又建中元年洪經綸撰張沔書永年 畿輔碑目

禱聰明山記 洺州刺史盧瑱撰不著書人名氏昭義

軍節度使盧從史禱於聰明山祠作此記從事并官屬

題名於後以元和二年七月立集古錄目元和二年盧瑱撰

永年畿輔碑目

右禱聰明山記盧瑱撰乃盧從史禱山神之記也閱從史官屬題名見孔戡烏重允俱列於後而感韓退之記載事云戡屢諫從史不聽卒為重允所縛掩卷歎息者久之嗚呼禍福成敗之理甚明而先事而言則罕見從事至而言則不及矣自古廢亡敗亂之國未始不如此也集古錄跋尾

案唐書宰相世系表有盧瑱官澤州刺史碑稱盧瑱

官洺州刺史與表不符蓋元和二年以後復由洺州

移知澤州皆昭義軍所屬官也又案金石考及碑目

皆誤以盧瑱為盧瑱撰

從史官屬題名 碑文末云自公及監軍使幕客郡守

列將等皆列名集古錄目所謂從史及官屬題名於後

者即此畿輔通志

獨孤守忠碑 韋承慶撰柳濟物書寶刻叢編碑在永年畿

輔待訪碑目

崔府君廟碑 在州城敷靈廟內寶刻叢編永年敷靈廟畿

輔待訪碑目

張邕碑 見寶刻叢編引諸道石刻錄京畿金石考張邕碑

永年畿輔碑目



宗城令衛知全德政碑 長慶二年北京鄭樵金石略

案宋宗城縣隸北京大名府其故城在今威縣東非今廣宗縣也

號州刺史崔元亮墓誌銘 墓在磁州鼓山下白居易

撰墓誌銘 舊志

文略云公太和七年薨贈禮部尚書以九年四月歸窆於磁州昭義縣畿輔通志

景明寺碑 見方志云在廣平縣北張村有光武御製

碑案此不知何碑之誤 京畿金石考 景明寺碑永年張村 畿

輔待訪碑目

案方志言在廣平縣北孫星衍引之列入永年誤樊

彬亦云在永年蓋仍沿孫氏之誤又案趙州在唐立

光武即位壇碑又有光武廟碑永年亦有光武廟碑

此疑亦唐人所立誤以為光武御製耳

五代

後周郭進頌德碑 在洺州 世宗時詔左拾遺鄭起

撰文 宋史本傳

宋

崔府君廟碑 磁有神廟峙於東門之內神姓崔諱子

玉顯名於隋唐之間為滏陽令有神政太宗朝召拜蒲

州刺史卒於官歸葬於滏陽磁人思其德立祠事之宋

咸平元年命守臣劉蒙正大修神宇榜曰崔君之廟石

正言知制誥趙安仁奉敕文其碑

元王德淵崔府君廟碑記

案通志碑稱府君即崔子玉甚謬蓋就民間相傳之

詞載入未加考訂也宋樓鑰中興顯應觀記辨之甚

詳可證此文之無稽也

崔府君廟額石刻 大觀二年太守韓景奉旨益崇廟

貌御筆書額以賜之景勒之於石

元王德淵崔府君碑記

中書令李沆墓碑 李文靖公家世廣平之肥鄉相宋

貞宗於咸平景德間去今幾五百年墓在肥鄉縣西城

內堂傾碑仆

明李侃重建李文靖公祠堂碑記

案通志李侃撰文時在成化十七年猶有仆碑可稽

逮嘉靖間郭郭撰重修墓碑文云碑碣儀物蕩然無

存則并仆碑亦胥歸泯沒矣

重建文宣王廟碑 殿中丞張萃撰其題首云洺州肥

鄉縣重修至聖文宣王廟碑

金龐雲碑記

碑文略云濮陽李公被廉察薦注令茲邑慨然歎曰我炎宋重熙累洽文章之盛炳然與三代同風天聖四載詔下郡縣皆許建學除學宮何斯廟不遵彝典獨褻慢之甚遂輯同案謀之得縣東南隅地廣袤數百步未逾時功即告成文內無重建年月今以金龐雲碑文考之知為宋熙甯元年也

勅建雞澤廟學碑 崇甯二年立

畿輔通志碑目

今無考

採訪冊

提舉隄埽司治觀堂記 趙子崧撰在清河

康熙志

此碑無年月縣志定為金時刻石遂題曰金趙子崧撰蓋未讀此文而率意秉筆者其文略云北京恩冀州大規模宏偉頻年不無頹敝開封劉侯念是治之不修迺鳩僦土木飭其廳事又即正寢之後北向為堂名曰觀堂而乞言於郡從事藝祖六世孫子崧以識之考北京乃宋朝大藩金改為大名府路使果為金時刻石不應尚沿宋之舊稱而子崧自稱藝祖六世孫其為非金人可知況子崧為宋太祖子燕懿王五世孫宋史宗室表有其名宗室傳載其事蹟乃宋宗室中忠誠有為之臣豈得列諸異代汚其姓氏且碑中大書藝祖六世孫與傳載燕懿王五世孫牒系正同第傳不錄其官恩州從事耳提舉隄埽司一官應屬都水監而宋百官志未詳河渠志云乾德五年詔開封大名府所屬州長吏並兼本州河隄使開寶五年詔開封等十七州府各置河隄判官一員以本州通判充又有河埽使提舉河渠等官其職司當與碑中所稱提舉隄埽司同而皆為宋百官志所不載蓋脫脫修史咸據宋代三省案牘及國史編錄宋自南渡後黃河已在幅員之外而北京掌故大半不可考鏡故於都水監所屬僅寥寥數員此防河各官

宋志不能詳載之故也又案子崧以崇甯五年進士至宣和間已官宗正少卿此碑撰於官恩州從事時當在大觀政和之際矣  
畿輔通志

李若水故里石碣 在曲周縣東關歲久湮沒乾隆十

二年掘地得之今尚存同治四年知縣王延桂重立新

碣 畿輔通志 案舊碑亦非宋刻故仍列入今無一類

聰明山神碑 陳薦撰在府城西南六十里山上神廟

碑文云此山紫山一峯耳或云即古之邯山 明一統志

金

重修偃月橋記 滏水石橋在磁州金大定初建趙秉

文記 明一統志

趙秉文卒於哀宗之末元好問撰墓誌云卒年七十四以此上計當大定之初甫數齡耳烏能撰碑文考明李已修橋碑金太和間曾加修葺可證明一統志之誤 畿輔通志

邑令納蘭武節德政碑 在縣儀門內明昌五年為知

縣武節立鄉貢進士段執剛記雞澤志今廢縣新志

女貞姓氏舊分白號黑號納蘭乃白號之第二等也見金史百官志 畿輔通志

洺州防禦使賀揚庭頌德碑 明昌中除洺州防禦使

時歲饑揚庭諭蓄積之家出所餘糶之洺人立石頌德

舊志

叢臺題詩石刻 邯鄲有叢臺世傳趙武靈王所築歲

已酉余分符作邯鄲宰觀叢臺傾圮殊甚不堪俯仰偶

覽邑志知叢臺本在城東北明嘉靖丙午前尹董威修城並及叢臺內剗出金人詩二石余時有修理志越三載始鳩工盡起其敝者而新之詩歌之在石者仍與砌

之壁上張慎登叢臺紀事

元

達魯花赤印 明嘉靖二十年推官王堯日督民修清

河縣城浚壕於東北隅得古印六顆文可識者二曰都

將領印曰達魯花赤印上之都御史藏於府庫清河志

案元史百官志府州縣均設達魯花赤一員都將領

無此名目或即都指揮使也

成安縣尉劉仁去思碑 楊威撰碑今沒

劉仁字寬夫順德府平鄉縣人充刑公勾當考滿授磁州成安縣簿尉莅事三年任滿將赴選成安軍民紀公實政隴石記之文中有至元四年聖旨黜冗員語考元史百官志不載是條世祖本紀至元四年三月壬寅安童言比者省官員數與碑中所言恰合歷朝掌故凡史乘所不能備載者碑版中往往見之至於遺愛去思乃碑版之最無足觀者而間有一二條可與正史印證者如此金石之可貴益信 畿輔通志

邯鄲主簿苗澤碑 至元間澤為邯鄲主簿去日民感

頌立碑紀之舊志

贈磁州知州程翔墓誌銘 袁梅撰碑已沒

案通志此文見清容集略云君諱翔世家廣平人墓在城西南卒於元貞二年子良佑仕推恩贈奉政大

夫磁州知州驍騎尉廣平縣子考今廣平府在元為

廣平路廣平縣元即有是名金石之例書里貫當言

縣不言路元朝賜爵大半就其本貫為封邑則程為

縣人可知

肥鄉重建成信侯殿記 新安方虛谷撰肥鄉志

殿祀春秋時晉趙氏家臣程嬰其碑文略云今廣平府故洛州肥鄉縣春秋時立趙孤近臣封成信侯程姓嬰諱之里也周景王之三年晉景公時屠岸賈攻殺趙同趙括侯與公孫杵臼謀藏趙朔之庶子趙武後禰奚韓厥言於景公復立趙武史記晉趙世家春秋內外傳通鑑外傳所書不同肥鄉之人祀之侯之後世居肥鄉程君玉欲新侯廟不果蔣君思為玉養子繼父志一新之元貞初元孟秋鳩工葺年落成用中統楮幣為錢五十萬有奇里人王君英求記其事云云案文獻通考元豐四年承議郎吳處厚言程嬰公孫杵臼保全趙孤乞加

封爵詔河東河北漕臣於其祠墓嬰封成信侯梓白封  
忠智侯立祠於墓側載之祀典宋史及續通鑑皆同  
畿輔  
通志

邯鄲聖井祠堂記 建聖井祠堂題名邑城之西有泉

距城二十里禱雨輒應名曰聖井元延祐乙卯春鄉人

董社長輩同建祠堂略刻記及姓名於柱石迨我朝正

統乙巳鄉人閱前刻於苔蝕中遂復建祠

明張成教聖井感應記

案乙卯乃元仁宗延祐二年

贈吏部尚書元貢神道碑 吳澄撰清河

案通志碑文見吳文正公集略云公姓元氏諱貢湖

廣等處參知政事明善之父也仕爲小官至元己丑

三月卒於蘇州大德甲辰十月葬清河新阡延祐丙

辰參政任禮部尚書特贈中奉大夫吏部尚書護軍

追封清河郡公諡孝靖己未參政自翰林侍讀出參

湖廣省政事明年春新天子召入集賢爲學士澄病

留江州邂逅水驛謂將樹碑孝靖公之墓以澄之舊

也合爲文案元史元明善傳不列其父之名己丑乃

元世祖至元二十六年甲辰乃成宗大德八年丙辰

乃仁宗延祐三年己未六年新天子英宗碑撰於明

善奉天子召道遇時英宗以延祐七年春嗣位卽於

是年立石也

建善政樓記 樓在府治前元延祐間總管邢秉仁建

有翰林學士王士熙碑今廢

縣志

文敘廣平總管邢秉仁建樓始末始於延祐六年十月成於七年九月記中所云戊午乃元仁宗延祐五年也

綴輔通志

翰林學士承旨劉賡神道碑 虞集撰威縣

案通志碑文見道園學古錄略云故承旨劉公賡歿之後聖天子入纘大統達奎章之閣學士忽都魯兒彌失在翰林與公同為承旨十餘年慨公之不及斯時也間為上言之上以為感制誥臣集著文載其行事於神道之碑公世為洛水人至元十三年授國史

院編修官延祐七年入翰林為承旨致和元年薨葬於洛水縣棲鸞鄉公孫寨先塋之次考元史劉賡有傳其事蹟與碑略同歷仕世祖成宗武祖仁宗泰定帝五朝凡三人翰林為學士承旨久典文翰為朝廷所重天曆元年卒案致和元年即天曆元年泰定帝以是年改元致和七月崩太子阿速吉八於九月嗣位改元天順是月文宗即位復改元天曆文稱賡歿於文宗入纘大統之前其時尚未改元則書致和為宜又案今威縣地金以前皆為洛水縣元憲宗二年徙威州來治至正中省縣入州明初降州為威縣賡

卒於未省縣以前故碑與傳皆稱為洺水人

崔府君廟鐵鼎款識 王夫人殿廢不可考惟遺一大

鐵鼎鑄文云大元泰定四年歲次丁卯靈惠齊聖廣祐

王夫人殿廣平縣左坊居民程良輔獻廣平縣舊志今失

磁州元王德淵崔府君廟碑云金有中原以衡山在宋境命府君權行南嶽事至元十三年歸嶽祀於衡山改封崔府君為齊聖廣祐王與五嶽歲時同致祭元貞二年加封靈惠齊聖廣祐王順祐靈懿夫人此鼎即崔府君夫人寢宮之物也州志略去其徽稱而以為王夫人殿誤矣 畿輔通志

撫州路治中李□墓碑 吳澄撰磁州

案通志碑見吳文正公集略云朝列大夫撫州路總

管府治中李侯生戊申年七月延祐乙卯六月卒年

六十有八天歷庚午葬滏陽縣南之祖塋其子輔乞

吳澄撰墓碑

重修采芹亭記 亭在磁州舊學宮前州人大中大夫

胡祇適撰記磁州志

案通志此碑年月不可考文敘達魯花赤知州等重

修亭始末憲臺侍御史馬公出家資立石以紀其美

馬公即馬天驥州人官至治書侍御史府志有傳

重修偃月橋記 滏水遶磁州城南關有石橋一金太

和間元至正間屢加修葺蓋徵諸往石云明李己重修偃月橋記

夫子廟堂記 安仁書院舊地在曲周縣東北五十里



元時為安仁鎮今為馬羅堡有元時翰林王公孺夫子

廟堂記 曲周志

達魯花赤諾懷墓碣 在曲周縣東北二十里胡家莊

舊有碣在路側歲久湮沒今墓傍翁仲頽然猶存 曲周志

運使王世鑑先塋碑 塋在廣平縣城東南三里斷碣

在焉額篆曰皇元王氏塋祭酒崔詠撰銘 廣平志 今無考

經幢 霍思壽撰尼四兒李善書在成安 畿輔碑目 今沒

御史王澤墓碑 墓在清河縣厲壇左澤元時為御史

墓有碣有牆壁明正德間子孫以貧鬻廢 清河志

